





黔草卷又八之四

奏疏

恭謝 天恩疏

會勘播界疏

題布都二司委官入 賀疏

題水德司改流疏

題裁興黃叅將疏

題催補道府缺官疏

題洪叅政給由疏

題勦仲苗劫掠道路疏

再乞終養疏

題征路苗恭報捷音疏

再奏討苗捷音疏

恭進銅鼓疏





續衣生黔草卷又八之四

泰和郭子章相奎甫著

奏疏

恭謝 天恩疏

奏為恭謝 天恩事萬曆三十二年十一月二十五日准

兵部咨該本部題為 天威遠震逆寇蕩平遵 旨覈敘

八路從征文武官員功罪以明賞罰以資安攘事奉 聖

旨朕賴將士之力討平播逆以申靈誅開疆展土奇勲懋

績允宜敘賞郭子章陞右都御史兼兵部右侍郎照舊巡

撫給與應得誥命廕壹子錦衣衛指揮僉事世襲賞銀捌



拾兩大紅紵絲參表裏欽此欽遵移咨到臣臣以天恩殊常循省非據具奏控辭至三十三年三月初三日准吏部咨該臣奏爲加恩殊常循省非據謹瀝誠控辭以安愚分事奉聖旨敕功加恩已有成命不淮辭該部知道欽此欽遵又移咨到臣臣祇奉溫綸謹設香案望闕叩頭謝恩訖伏念臣子章行能劣薄品格低凡一生梯航於粵閩中年迴翔於藩臬頃承人之出撫龍番之區偶際時艱會討夜郎之逆而臣患貧患寡多懼多凶六月與師竟籍廟略九重宣捷何與臣勞乃荷宸綸特蒙帝眷恩生不次事出非常秩晉中丞謬竊紀綱之任

銜兼右侍俾貳爪牙之司文綺錫自尚方精鏐放於內帑因枝葉以及根苑龍章上侈於親親繇文臣而蔭武銜金吾遠逮於世世祖禰拜命襁褓分榮循省實爲逾涯控辭匪敢飾讓伏蒙陛下念深簪履恩過生成慎以退人容於竊祿頓寬朝廷之法典仍錫重鎮之簡書臣感恩而涕下霑襟忍愧而汗流浹背誓當飲冰食蘖鏤骨銘肌拊集漢夷勉守亭障葺申絲髮之效上酬天地之仁臣無任瞻天戀闕感戴兢懼之至

會勘播界疏

題爲播地蕩平經制宜定并勘播事體重大等事萬曆二



十三年二月十六日桂川湖貴總督王侍郎會稿移稱夷  
有夷情民有民情索還侵地執夷情者尚謂不可強羅鬼  
之情以就法而地去糧存執民情者亦何敢強殘民之情  
以就夷本部院等謹遵照 皇上屢旨從公酌議惟有蜀  
不責地黔不責糧二語庶幾可以永杜爭端不然水西種  
地播人賠糧雖攤派毫釐播人斷不甘心今黔中又堅執  
不肯全認本部院竊思之事已四年猶然不定日復一日  
延更何時勢既至此本部院亦末如之何也已今該本部  
院與按院暨二司各官連日集議不得曲為遷就議將  
所遺本色米玖拾陸石折色銀壹千肆百捌拾貳兩叁錢

內以壹千貳百壹拾柒兩伍錢分派於播本部院隨牌行  
據右布政使張文燿開報空餘田土內遵義縣清潭沙溪  
永安等里原撥水邊衛所官折俸田地除羅天寵等三員  
仍應存留綏陽縣金竹等四里拋荒叁千伍百壹拾肆畝  
尚未開墾與蘭邊折俸叁千陸百壹拾肆畝官職未定俱  
難科差外其將官養廉該田貳百叁拾畝千總四員該田  
肆百畝俱應裁革共計田地陸百叁拾畝該糧貳拾肆石  
貳斗該銀肆拾叁兩伍錢陸分加之裁省原編遊擊守備  
參員廩給公費銀叁百壹兩伍錢通共銀叁百肆拾伍兩  
零陸分俱堪充數其餘捌百柒拾貳兩肆錢肆分攤派遵



義等州縣代納仍有折色銀貳百陸拾肆兩捌錢本色米  
玖拾陸石并前壹千陸百捌拾貳兩肆錢共計貳千之數  
俱責令湄潭水西遞年照數辦納供黔等因又准巡按四  
川監察李御史揭稱督院責在清疆意主復地固爲國  
也非爲私也撫院責在綏柔意主示信亦爲國也非爲  
私也跡若相左意實相成今據四川司道之議蜀不責地  
黔不責糧者哉二語決斷截然國體旣尊疆界亦正求  
息爭端策無踰此乃貴州司道又謂督院原題水西占  
額止壹千貳百伍拾貳石湄潭等縣割地肆百叁拾貳石  
肆斗實在播州原額伍千捌百伍拾石之內其說未爲不

是若將播額盡令安疆臣納黔則夷不信服恐未必從撫  
院咨稱壹千陸百捌拾貳兩肆錢聽黔自徵亦已認去強  
半此兩省執議之大槩也各有一說議非鑿空職商之司  
道集議再三業已僉同不盡徇蜀亦不盡徇黔就中斟酌  
總計播州原額貴州倉糧伍千捌百伍拾石內折色伍千  
柒百伍拾肆石共該折銀叁千壹百陸拾肆兩柒錢本色  
米玖拾陸石不必銖銖兩兩細論某地歸黔某地予夷某  
地納賦亦不必喋喋瑣瑣較計每石折伍錢伍分每石折  
壹兩每石徵拾兩捌兩之說第以見在折色叁千壹百陸  
拾肆兩柒錢本色米玖拾陸石折銀伍拾貳兩捌錢通共



折色參千貳百壹拾米兩伍錢令黔認回貳千兩聽其自  
徵餘銀壹千貳百壹拾米兩伍錢應於遵義派解等因到  
臣案查萬曆參拾貳年玖月拾捌日准兵部咨該督臣王  
象乾具題前事又該四川按臣李時華題為勘界事難  
結局遵旨隨時奏聞等事俱奉聖旨該部院知道  
欽此該本部會同都察院會議覆請奉聖旨遵義水  
西地界如何尚未處定國家以安邊靖民為重豈得畏避  
嫌疑因循持久這題覆著行與該督撫巡按遵照議處來  
還立限與他錢糧加派懸編原非久計革屯裁官等事著  
一併酌議來奏欽此欽遵合咨前去煩為會同川貴督按

衙門以文到之日為始定限本年九月以裏逐一會議妥  
當上緊會奏以憑覆請施行准此本年十二月初六  
日又准督臣咨稱據司道議詳盡捐地界界之水西不若  
卽以千工堰等占額湄潭割地二項并張八冊認糧以壹  
兩捌錢起科之例抵作原額黔糧參千貳百壹拾餘兩之  
數蜀不得索地於黔黔亦不得索糧於蜀煩請議覆見示  
以憑會題施行准此就經備行布按二司并畢節兵巡  
道會議隨據會呈奉臣憲牌仰司道將川省議以各地界  
盡界水西令其認納播州原額貴州糧銀參千貳百壹拾  
米兩伍錢聽黔自行徵納事體有無受便夷民是否樂從



逐一會議妥確具由通詳以憑移覆會 題奉此又據經  
歷司呈抄蒙巡按貴州監察金御史憲牌據四川布政司  
經歷司呈詳前事看得所議大約蜀不求地於黔黔不索  
糧於蜀第事關地方謀貴詳慎合行查議爲此仰司抄牌  
呈堂即便會同按察司并畢節道查照來文細加參酌要  
見所議將地界盡畀水西卽以本省千工堰占額湄潭割  
地并張伯澤等處共認糧壹千玖百柒拾餘石以遵義每  
糧壹石起科銀壹兩捌錢其事體安便與否前令安疆臣  
止認納壹千貳百伍拾石尚無歸著今盡令本酋代輸遵  
義之糧果心悅誠服與否據稱盡捐地界還黔前畢節道

踏勘還蜀水煙天旺東隆上庄等貳拾餘處今在退還數  
內與否仍查平越新府果否每糧壹石徵銀拾餘兩逐一  
從長酌議務要地方夷情相安事體經久安便議明通詳  
以憑移覆會 題母得模稜兩可等因抄呈到司蒙此該  
布政司掌印左布政使趙健會同按察司掌印并帶管畢  
節道按察使元錫類會看得退地之議先奉兩院批行帶  
管畢節道洪參政前往水西踏勘畫圖前來責令安疆臣  
將水煙天旺桃溪南京壩貳拾餘處退還遵義其上庄東  
隆係沙溪河以西地原非播土若張伯澤係安疆臣大方  
切近後徑目祀人等墳墓旣多居住日久合無免其遷徙



黑州 卷之八 奏摺 六  
令輸糧自效該二司會同畢節道議令安疆臣歲代遵義  
輸糧貳百石以示包茅之貢蒙撫院批令再加壹百石共  
叁百石令安疆臣輸糧於黔以抵蜀應納貴糧之額續奉  
總督王侍郎案驗仰司查照題奉 欽依事理一面備呈  
該省按院裁議一面會同畢節道將渭河關以至烏鴉尾  
等地共壹百叁拾叁處逐一勘議明確上緊具由通詳等  
因已經會同畢節道備行畢節駐鎮徐通判會同四川委  
官踏勘未據回報前來又奉撫院案驗准兵部咨文稱總  
督部院疏內云水西占額壹千貳百伍拾石及湄潭等縣  
割額玖百玖拾石勢不得不取之侵地等因今又奉本部

院牌行川省議以渭河關千工堰及張八兩諸地盡捐與  
水西而責令安疆臣認銀叁千貳百餘兩該本司等查得  
播州原額貴州倉糧伍千捌百伍拾石內折色伍千柒百  
伍拾肆石每石折銀伍錢伍分共該銀叁千壹百陸拾肆  
兩柒錢又本色米玖拾陸石此播州原額載之通誌可考  
也今奉總督部院據司道所議盡捐地界昇之水西不若  
卽以千工堰等占額湄潭割地二項并張伯澤認糧共壹  
千玖百柒拾餘石此不必勘地之煩擾而直以一紙可定  
地方何幸卽牌行安疆臣責令遵依去後未經回報前來  
今蒙催詳該二司會同畢節道看得安疆臣占額壹千貳



百伍拾石雖未經踏勘而奉有題過之數只得責令安疆臣照數輸納上不失原疏之數下可以服夷人之心但播州原糧止每石折銀伍錢伍分則今代輸亦宜每石伍錢伍分筭糧壹千貳百伍拾石止該銀陸百捌拾柒兩伍錢代輸貴州今要認銀叁千貳百餘兩則甚踰於播糧原折之數恐夷人未必心服而願輸也據來文四川司道云水西侵過播地陸百餘里查得貴州省下由龍場驛至遵義界不過百五十里而安疆臣反侵地陸百里恐無此理或者未親至水播地方而億度之辭乎又查平越一府之糧止貳千柒百伍拾石今貴州還遵義府筭去伍千捌百

伍拾石則貴州所受於朝廷者反少而所失於遵義者反多矣川貴皆藩司也川解黔止每石伍錢伍分黔還川便筭每石壹兩之外水西占地止壹千貳百伍拾石今還遵義便筭伍千捌百餘石占之少還之多解黔則從輕還川則從重恐黔人將議其軒輊而二司亦無解於黔人之口矣又蒙按院牌查平越府果否每糧壹石徵銀若干查得平越遵義每糧壹石徵銀或多者係丈量實田實地因糧起差因差起科不得不然若安疆臣責令認糧壹千貳百伍拾石是奉題疏之數而責之以從命非丈量實地也倘再以疏外之數責之似難以信服夷人之心至若湄



潭等縣割額之數先蒙本院牌行布政司轉行平越府查得湄潭縣祥川三里共糧叁百捌拾石西角三坪捌石肆斗餘慶縣江外山羅等貳拾肆石甕安縣甕水四牌西坪貳拾石共折色糧肆百叁拾貳石肆斗則實在播州原額伍千捌百伍拾石之內今三十二年又蒙本院批行平越府照舊徵派折解貴州上納則合於遵義府應解黔糧內照數減去肆百叁拾貳石肆斗而不必責之安疆臣矣通前安疆臣代輸壹千貳百伍拾石之數與湄潭等縣割地肆百叁拾貳石肆斗之數總於遵義府聽解黔糧內減去壹千陸百捌拾貳石肆斗共減去折銀玖百貳拾伍兩叁

錢貳分餘剩糧肆千壹百陸拾柒石陸斗合無仍令遵義府輸之貴州以存協濟之義等皆有司惟法度是守惟尺寸之信義是遵若審處之權請自憲裁至於真州司額解興隆倉儒學師生廩糧叁百伍拾石每石折銀伍錢該銀壹百柒拾伍兩既蒙督院牌行於四川庫動解以給興隆衛廩生則不失原額無容別議等因到臣該臣看得水播地界先奉 明旨行令兩省會勘臣節行司道勘議嗣據會詳議令安疆臣將水煙天旺等貳拾餘處退還遵義其上庄東隆係沙溪河西之地原非播土至於張伯澤係安疆臣大方切近後路目民住種年久墳墓難遷令疆臣



認納播州原額黔糧貳百石臣似覺太少復加壹百石共叁百石業經具題及移咨督院外今准前因又經行據貴州司道議令安疆臣認納占額壹千貳百伍拾石蓋謂此數乃部院已經題請不得不為曲從又令平越府認納湄潭割地肆百叁拾貳石肆斗連前二項通共壹千陸百捌拾貳石肆斗總於遵義該納黔糧伍千捌百伍拾石之內照舊額以每石伍錢伍分折筭黔省認銀玖百貳拾伍兩叁錢貳分其餘尚該折色銀貳千貳百叁拾玖兩叁錢捌分本色米玖拾陸石仍令遵義解黔此據原額論也再四惟之馭夷以信義為主水西占額壹千貳百伍拾石

自貴部院題奏兵部奉旨行勘職行之司道下之夷司有年矣今一旦加至伍千捌百伍拾石是盡播糧皆令水西納也是盡播地皆水西占也是令職失信於夷人也恐夷人執亦難從制賦以原額為主昔日播州納貴州糧原額每石伍錢伍分今日水西納遵義糧令每石壹兩捌錢是一地而今昔二額也且水夷見納貴州糧額除壹拾陸驛夫馬自當外每年實止納倉糧叁千石今責令納遵義糧伍千捌百伍拾石是納於本省者反少而納於鄰省者反多也恐夷人執亦難從而世無不結之局事有折中之議黔議伍錢伍分太少遵義議壹兩捌錢太多總計播



州舊額納貴州糧實銀叁千壹百陸拾肆兩柒錢米玖拾陸石黔中認回一半卽以水西占額壹千貳百伍拾石每石以壹兩筭計銀壹千貳百伍拾兩湄潭認回肆百叁拾貳石肆斗每石亦以壹兩筭計銀肆百叁拾貳兩肆錢共該壹千陸百捌拾貳兩肆錢聽黔自徵遵義尚該折色銀壹千肆百捌拾貳兩叁錢本色米玖拾陸石解納於黔如是則於部院原題之數不悖昭大信也於播州原納貴州之糧猶存其半守原額也職苦心竭力委曲遷就議如是止矣此外遵義實該銀壹千肆百捌拾貳兩叁錢米玖拾陸石真安州該銀壹百柒拾伍兩解黔如部院以黔係

總轄地黔人卽蜀人也令遵義解納此部院字貴州之仁也惟命如部院以遵義新設養軍費侈難以解黔此部院愛遵義之仁也亦惟命如謂事屬兩省難以便斷則職會同部院請之朝廷其子其奪一聽之朝廷則二省之交喙可息而四年之勘局可結矣事因移覆督臣會題去後至三十三年正月二十五日又准兵部咨該臣題爲遵旨會勘播界蜀中先已具題等事又該督臣題爲播界勘處將定等事該本部會議改限三十三年三月以果議妥具奏等因覆奉聖旨是這地界事著行與該督撫按遵照履旨依限平心議定來奏毋得再有參差貽誤



邊詳欵此備咨前來覆權間今准督臣移到前項會稿內  
稱播州原額黔糧內以壹千貳百壹拾柒兩伍錢分派遵  
義等州縣徵解於黔餘貳千兩俱責今湄潭水西遞年照  
數解納供黔又准四川按臣揭稱播州原額貴州糧銀令  
黔認回貳千兩聽其自徵餘銀壹千貳百壹拾柒兩伍錢  
應於遵義派解等因該臣查得播州額銀蜀中止認壹千  
貳百壹拾柒兩伍錢令黔認納貳千兩除水西湄潭共認  
外尚少叁百壹拾柒兩陸錢不足貳千之數臣牌行布按  
二司畢節道會議去後今據會呈該布政司左布政使趙  
健會同按察司按察使尤錫類帶管畢節典選道副使何

子益會看得水西遵義之界勘議久矣今因原題過水  
西占糧之數責令認納遵義壹千貳百伍拾石之糧以湄  
潭等縣割地之數令認納肆百叁拾貳石肆斗之糧是  
題過割過之數不得不遵者也遵義之糧原折每石伍錢  
伍分則今認糧亦宜每石伍錢伍分安有一糧而可兩例  
者但今奉本院議加作每石壹兩責令水西認銀壹千貳  
百伍拾兩湄潭等縣認銀肆百叁拾貳兩肆錢解於貴州  
司庫以作遵義應納之數則糧雖未增於所題之數而  
銀實倍於遵義之額即壹千貳百伍拾兩之數在水西已  
不肯承認而責之以奉公之意臨之以兩院之命則安疆



臣不得不認耳實非其心悅而誠服者也至於湄潭等縣每糧壹石出條鞭銀柒兩以供府縣官吏俸薪門皂夫馬等項差役湄潭之民已屢訴不勝其苦矣若又以叁百壹拾柒石陸斗而青水西與湄潭等處再認叁百壹拾柒兩陸錢之銀在水西則謂漸講漸增恐非所以示夷狄之信在湄潭等縣則謂苦之又苦恐非所以恤新集之民職等竊以為壹千陸百捌拾貳兩肆錢之數在水西湄潭不得不認而叁百壹拾柒兩陸錢恐難以再加之若強而加之則此叁百餘兩之軍餉終屬烏有矣伏乞憲裁令可以服夷民又可以蘇新民而不失貴州軍餉之額則地方幸甚軍

民幸甚至於仍有糧壹千貳百壹拾柒兩伍錢派之道遠義與真安州壹百柒拾伍兩解之川省則議論已定毋容他議等因到臣該臣會同總督川湖貴州軍務兼理糧餉巡撫四川地方兵部左侍郎兼都察院右僉都御史王象乾巡按四川監察御史李時華巡按貴州監察御史金忠士會議得黔黔疆土原有一定界限沙漠巡檢司渭河驛載在大明會典並屬貴州川貴以烏江為界載在大明一統志原無渭河為界之文而播人漫執唐宋鐵牌之說似執古以御今自遵義府城至貴州省城頃者兵戈相接近日輿馬相通不過貳百里而播人猥云夷人侵占陸



百里亦指遠以爲近臣前疏業將司道查勘始末一一備陳無敢再三以瀆天聽今幸督臣俯從納糧大撤藩籬無必拘拘道里遠近以滋紛紜惟是播州舊額黔糧伍千捌百伍拾石內折色伍千柒百伍拾肆石該折銀叁千壹百陸拾肆兩柒錢本色米玖拾陸石該折銀伍拾貳兩捌錢通共叁千貳百壹拾柒兩伍錢先准督臣議以此糧銀俱令黔認此謂水西占額壹千貳百伍拾石雖未丈量但已經督臣具題之數不敢不遵無論夷人占與不占從與不從責令其認納以完勘合又令湄潭認糧肆百叁拾貳石肆斗又令湄水不必統伍錢伍分原額每石算銀壹

兩共壹千陸百捌拾貳兩肆錢聽黔自徵餘壹千肆百捌拾貳兩叁錢米玖拾陸石應令遵義解黔百方委曲似亦可以結局乃今蜀中止令遵義認納壹千貳百壹拾柒兩伍錢仍令湄潭水西共認貳千兩則於臣原認壹千陸百捌拾貳兩肆錢之外又多叁百壹拾柒兩陸錢事係兵餉無從措辦行令司道會議據詳水湄俱難再加則此叁百壹拾柒兩之數安所屬乎臣等看得加之夷人則大信不可失於夷狄而夷未必即從加之湄潭則罷民不可加以重斂而民未必即輸而黔中之軍餉分毫不可失額他日軍士替替臣等安所逃罪臣反復思之蜀與黔均

皇上



之子也蜀黔地界之議肆年不決兄弟之閱也貧弱之弟不能得之於兄不得不求之父母弟今所少者歲董冬百餘兩其數原不甚多而貧黔實無所處查得工部新開納事例銀兩每年取解壹千兩而黔納吏者甚少歲董有其半如冬拾貳年行取壹千兩止有肆百壹拾捌兩借別項湊足起解臣意前銀叁百壹拾柒兩陸錢蜀既不認黔又無抵合無卽以工部新增事例銀兩每年查實納銀若干動支叁百壹拾柒兩陸錢同水湄認納壹千陸百捌拾貳兩肆錢共足貳千兩支給軍餉此外若有贏餘仍舊起解其遵義應該解黔折色銀壹千貳百壹拾柒兩伍錢并

真安州額給興隆衛學師生廩糧銀壹百柒拾伍兩蜀已認納自後每年務要如數解黔不得再行推延兩省地界各照舊住種不得再行紛爭至於湄潭縣地臣等會同前督臣李化龍具題以三渡板角苦竹叁關爲界近綏陽湄潭二縣紛紛復議而湄潭又認回遵義糧肆百叁拾貳石肆斗亦當以原題界爲正行二縣遵守若遵義革屯裁官等項督臣疏中已詳劉勝賣地事情應聽四川按臣勘問具奏非臣所能與者理合具題伏乞勅下兵工二部都察院再加酌議覆請行臣等兩省遵照施行爲此會本謹題請旨



題布都二司委官入 賀疏

題爲慶 賀事據貴州布按都三司會議呈稱萬曆三十三年八月十七日恭遇 萬壽聖節并賀 千秋令節例該三司堂上官各一員預期齋捧 表文赴 京慶 賀今查布政司安平新鎮二道未補貴益道尚未到任止有思仁道叅政洪澄源於三十二年入 賀今方復任該道駐劄銅仁思南地方正三省苗夷雜居之地思石兵備道未補銅仁思州二府俱缺銅仁守備李文奇文未到任近報苗夷出沒陳總兵方日議鵬剿正藉該道彈壓又按察司驛傳提學都清三道俱未補感清道雖補亦未到任止

有畢節兵巡道叅議兼僉事冉德升於四月二十一日到任會委齋捧又都司止操補僉書高垣在任地方多盜擒捕爲急輪該屯田都司僉書陳雲鸚進 表亦未到任今時將五月正入 賀司官起行之日不敢遲悞除按察司冉叅議齋 進外及查嘉靖四十年四十二年隆慶元年二年五年萬曆十七年二十三年二十八年三十年因缺堂官詳委首領經歷知事照磨趙謨孫江劉沛黃誥黃文獻葉奕光冉崑江師周周大絃等代 進今布政司理問所理問高瀛應委代齋本司 表文又原任貴州都司管思石守備事錢中選堪以代齋都司 表文庶得奉差發行



以成慶賀大典等因到臣卷查先准禮部咨內開齋  
進慶賀表文如遇二司缺官或地方用兵差占許改  
差首領等官前來行禮巡撫巡按官先期奏行禮部查  
考等因備行遵照訖萬曆八年九月內准吏部咨該本部  
題奉 聖旨今後二司官凡奉勅整飭兵備有地方責任  
的不許夤緣進表規避誤事者該科查察處治欽此欽遵  
等因備咨前來案行各該司遵照去後今據前因該臣會  
同巡按貴州監察御史金忠士會議得海內臣工恭遇  
萬壽聖節莫不踴躍祈天奔走就日用伸嵩岳之  
呼共致華封之祝但查貴州司道額數本少此時員缺

獨多已缺者未補新補者未到在布政司外道止思仁道  
叅政洪澄源一員在任而銅仁獠苗四出正賴彈壓在都  
司僉書止操捕都司高垣一員在任而門庭悍賊跳梁尚  
須緝捕二官一以備苗一以備賊均屬喫緊委難離任除  
按察司差委叅議兼僉事冉德升外布都二司謹遵地方  
用兵差占許改差首領等官事例行布政司差本司理問  
高瀛都司差原任都司管思石守備事錢中選恭行齋捧  
表文赴京慶賀爲此會本謹具題 知

題水德司改流疏

題爲俯順民情改設縣治懇乞 聖明銓官鑄印以昭



國法以靖邊疆事據貴州布政使司呈奉臣憲牌仰司移會按都二司思仁思石守巡二道將思南府水德長官司改土設流事情與建置應用錢糧官吏定額俸糧柴馬等項照依改設新貴銅仁等縣事例逐一查議具由通詳以憑會題施行毋得遲違奉此就經移行按都二司守巡二道查議去後該本司卷查萬曆參拾年伍月拾柒日奉巡撫貴州郭都御史批據思南府水德長官司土舍張治貴首稱土官張輅年老無嗣貴係庶出子孫應該承襲被二房張治安爭襲揮血盟神憑舉封送銀肆拾叁兩約欠伍拾柒兩與貴逼壓買和謀奪官職首乞追銀入庫依律

正罪情由奉批仰貴陽府查究報又奉批據張治安訴為開縣安民照例俯憐祖勳事稱遭二房張治安謀買官職牽告多年乞要批照新貴縣事例賞貴縣丞職銜賜給執照子孫承襲管理糧馬情由奉批仰布政司會同按察司查議報奉此又蒙巡按貴州監察宋御史批據張治安訴同前事蒙批布政司議報蒙此當經移會按察司并牌行貴陽府拘提詞內有名張輅等一千人犯及原日審問文卷解司該本司署印畢節兵巡道洪副使會同按察司署甲都清兵巡道袁副使會審戶長張輅供稱張治安用銀叁百兩買囑張輅見交壹百伍拾兩尚大壹百伍拾兩今



治安在省又許送治貴銀壹百兩見交肆拾叁兩欠伍拾  
柒兩俱首在軍門發貴陽府貯庫治安原不應襲只是廣  
財賄買等情會審看得土官襲職以長為序張輅年老無  
子張治貴係本房長子孫應繼張輅承襲乃十餘年來羣  
議紛然靡有所定曷故一為張氏宗圖不登貴名二為貴  
祖張輅用載義丁三為治安多方賄囑假職於張輅之手  
而不歸也夫治安為二房子孫例不得越繼憑藉錢神敢  
以朝廷爵土私相授受贓證昭彰無容閱已姑未論倫  
序卽妄希替襲廣財行賄而方得冠帶輒害部民已玷官  
常大千王章藉令治貴不應繼據法亦不應令治安得

之改土為流事干題

請顧揆諸今日事勢委似不可已

者土司之虐民甚矣蔡人吾人豈置度外而今貪暴者傲  
然於上以縱其淫况見利必爭土司常態爭釁一日未息  
則彼地之民一日未得息肩往事其明鑒也俯採輿議將  
該司改建邑治遴科首為正官其土官世襲已久未可革  
除卽順輿情以張治貴為土縣丞佐之庶邑政有主土官  
不得暴彼民而事權既分覬覦者自寢謀乎用夏變夷解  
爭息民是在今日至於設流一節衆皆樂從相應連人呈  
解軍門裁審定奪緣由奉批水德司土官爭襲有年矣據  
原招主張治安據今詳主張治貴但治安以壹百伍拾金



賄張輅以肆拾叁金賄張治貴今俱追出在官業已行賄何說之辭况該司里老合口一詞俱云治貴係張氏長房又云治安甫得衣冠科害部民卽爲人上者亦惡能以意予奪之也第張輅老而病治貴貧而弱治安富而復以治貴襲治安他日勢必復爭據該司里老及張輅叔侄俱願改土爲流而以應襲者照新貴縣例爲土縣丞一以息爭一以安民此亦用夏變夷之一會乎第治安未經到官恐後猶有他辭仰拘再審詳奪奉此又蒙巡按宋御史批據本司經歷司呈同前事蒙批改土爲流以安地方邊疆第一美政但治安未到對審以屬偏辭復有他說未易會

題須在委官到水德以觀人心以諮輿論仍候撫院議行繳蒙此就經牌行思南府拘提各犯到司連人發仰貴陽軍民府從公審問明白具由連人解司覆審轉詳隨據該府申稱該本府會同熊推官都勻府羅推官行拘犯人張治安張治貴張輅張樞辰等各到官審看得張治貴之與張治安爭襲祖職各執一詞在治安稱治貴係乞養子孫不應承繼在治貴稱治安以貳房賄賂謀印奪官夫治安原係貳房若長房故絕別無爭襲可繼之人則應治安承襲其名正其言順安用賄者乃始以壹百伍拾金賄張輅繼以肆拾叁金賄治貴憑藉錢神况和謀襲此賄賂一端



卽應襲亦當奪况又倚藉護印剝削土民結怨鄉里其不可使之一日居於人土明矣治貴雖堅執長房而父祖既不能襲之於先其爲計疎治安雖駕言貴係乞養而賄賂顯著其爲計譎均難襲替今以兩家之故而驟削之則父祖故職一朝盡滅合無於參房子孫擇壹長者承襲以爲鵠蚌相持之戒其水德司改土爲流一節衆口俱皆稱便而治安與治貴與戶族張翰等及該司里老各已呈遞願狀在官人心充服原額錢糧站馬差徭悉歸縣納長家改爲土縣丞隨縣供職如此庶幾端可息積案可銷等因連人解詳到司審得張治安張治貴始祖張玉係思南府水

德司正土官張玉生張羽張翬張翎張翥張玃伍子長房張羽有子肆人張輦張騎張繼恩張輅而先年親枝圖內止有張輦張繼恩張輅參人之名論齒次則騎爲輦之弟繼恩與輅之兄也張羽老而輦襲輦故該及於騎乃舍騎不襲而以繼恩張輅襲之騎非親子明矣騎非親子故不入宗枝圖內張治貴乃騎之孫安可指爲親枝而冒襲乎張治安雖是貳房張輦之孫而用賄買襲旣得罪於王章藉印剝削又結怨於里民真不可一日居民上者而又安可襲也長房貳房皆不可襲應該於參房張翎子孫擇其長者承襲以守先緒以息爭端此一定不可易之法而



治貴治安亦各無辭至於改土設縣一節據該司里老謝周李宜侯顯周袁興暢張國孚等同詞爲祈天開縣安民以靖地方事訴稱土官世惡肢削小民歲有無名之征民受剝脂之苦又信任亡命流徒視文申害良善若蒙垂念設縣下有雲霓之望上施救焚之澤一時草木俱荷陽春則該司人民想望設縣改流之意切矣乘此機會改爲縣治設知縣壹員擇用科目賢者使其化民善俗設典史壹員使之司捕佐政緣民心之願爲變夷之機於化夷之中得息爭之權是在今日之所當亟行題請者也又據里老謝周等訴稱張輅楊一龍等土官皆係乘機僞襲祖宗

原無誥勅理不當襲合行提查貳姓果有誥勅方許

襲上縣丞主簿之職如無誥勅似難承襲除提查明白

再議等因呈詳巡撫郭都御史批水德司張楊子孫俱不

法害民民心望改流有如饑渴矣第其先世效順不可輕

廢其世官土丞土簿又有新貴等縣明例可據張氏隄第

參房張棚孫爲土丞楊一龍爲土簿仰司行府速拘貳姓

國初誥勅查明以憑會題繳奉此又蒙巡按貴州監

察卑御史批張羽係土官張王長子有子肆人輦輅繼恩

輅是也使輅果羽親骨血則輦襲之後序當及輅胡羽存

日舍輅不襲而以繼恩張輅襲之其爲乞養之子無疑也



輅為張治貴之祖既不獲承襲於前而治貴為張輅之孫  
又豈能爭襲於後耶不得以長房藉口也明矣張治安雖  
貳房張輅之孫而亦冠帶之先多方賄賂既冠帶之後無  
端剋削大失民心又豈可使佩綬握符而立民上耶欲息  
爭端而服土民非參房張翎之孫擇其長且賢者襲之不  
可也但土官襲職終恣夷性而肆虐焰今該司里老與該  
學諸生并鄉官舉監等具呈改土為流設壹知壹典科目  
之賢者以昭 聖治本院細審咸僥首樂從此又安民彌  
爭之大機括也俱如議候撫院會 題行繳蒙此就經行  
追貳姓 誥勅一向延捱俱無送驗至萬曆癸拾陸年伍

月拾壹日蒙巡按貴州監察金御史批據本司經歷司詳  
據思南府呈蒙本司紙牌蒙按院批據本府水德司民張  
治貴告稱張治安黑天異變誣滅長房張輅子孫絕祖張  
羽宗嗣事情行府查審為照土官承襲乃 朝廷重典儻  
嗣續不明本原弗正自有 國法毫不敢爽也今張治貴  
與張治安爭襲事情已有先日各府查審詳奪之由又奉  
院司明察斧斷之示歷歷在卷炳若日星今治貴復有此  
詞顯係刁訟法當解究但各犯先已問擬無庸再議相應  
俯照原詳定於改土為流貳犯俱不隸襲等因到司該本  
司看得貳犯事情先經俱已問結合無俯照原詳貳犯俱



不雅龔准令參房張棚之孫承龔且奉軍門批驗 誥勅  
而無以送驗又安知其土官之果真耶據地方土民萬口  
一詞咸願改流設官區區土官有何功德不可泯滅而必  
欲其承繼合無俯照該司鄉官舉監士民之請改爲縣治  
設知縣壹員以掌縣政典史壹員以司捕務則可以化夷  
可以息爭實該司又安長治之策如欲不絕土官之世緒  
則倣新貴等縣之例姑將參房張棚之孫擇壹人爲縣丞  
以副土官楊一龍爲主簿則既可以安水德司之民又不  
失土官之緒此合司人心之公願而今日事勢之可行者  
也等因蒙批准候撫院會 題繳又奉巡撫郭都御史批

仰候會

題行繳奉此又該本司查得萬曆貳拾玖年拾

月初參日奉巡撫郭都御史批據水德司吏承龔靖雲等  
連名呈爲祈天察弊除害安民事水德司副土官楊一龍  
蠹政虐民剝人脂膏吮人肌髓罪惡滔天神人共憤衆里  
老謝周侯顯周等條冊具載霸占伊弟楊一鳳街基田土  
扛擡毛林幼女冒侵賑濟官銀藉李總兵經過派銀每丁  
參兩猶科柴馬不耕不織家皆巨萬擅科擅罰起建高廳  
既無 誥命的係假官乞賜比照銅仁司李永授事例正  
法開縣黎庶安生萬民感戴等情奉批仰布政司查究報  
本司備牌行思南府提問究詳該府遵依行拘犯人楊一



龍等到府該本府陰知府會同趙推官審看得楊一龍土  
弁庸流存心苛刻取民物如草芥輕減鋪戶之價銀視冠  
裳若弁髦濫給壽官之文帖爪牙任其縱橫而恬不知檢  
婢妾隨其放棄而漫不加憐甚至拆毀官樓自脩吏舍上  
索王章大乘法紀事既有歸罪自難肯其他詞內所訐  
打死人命姦占妻女奪占民業霸占官地種種不法難以  
盡究姑以一龍降為土主簿職銜不許管事仍將一龍擬  
以應得罪名加罰稻穀貳百石追價作正所有前拆該司  
樓料責令賠還價銀叁拾兩以充脩縣之用等因招詳到  
司看得楊一龍心似豺狼孽向梟獍遇事隨風捕影即陷

人於死而不知恤假故利己損人雖寒如乞丐漫無加憐  
暴毒一方凌侮部衆則本犯之惡乃土司之最者且查節  
告訐情詞狀他不悉論即虧減鋪行擾害鄉屯濫授冠帶  
縱牙爪棄婢妾拆官房俱干法紀本當再提重處以為諸  
土司玩法者之戒但經該府審招前來姑照原擬革去副  
長官職銜姑與土主簿止給冠帶不許管事亦不許科支  
柴馬等因奉批楊一龍等姑依擬一龍免參罰穀貳百石  
折銀上納脩縣吳勝革退餘如照庫收繳改土設流聽另  
卷查結奉此又據思南府申據水德司里老謝周等條陳  
切緣永樂年間革去宣慰田宗鼎開設府治彼時草昧暫



留各土官者恐幫宗鼎爲亂也今正土官張輅之嗣受銀  
叁百賣官與族惡樂舞生張治安越序營甲害民真所謂  
前門拒虎後門進狼矧異日爭襲貽害匪輕副土官楊一  
龍蠹政虐民大肆聲勢被告節有屢案存證况本司人民  
數萬科第相續衣冠相仍生員叁百餘人吏承不計其數  
城市鄉村家事詩書以堂堂文獻之地乃受制於土酋華  
民夷官體統實不相稱豪傑之輩往往扼腕而抱不平等  
情又據該府申據儒學生員田于准冉奎等會集明倫堂  
公議思南建郡之始邑屬卽當同建第恐濟惡宜慰暫以  
目把僞襲土司以縻異志迄今 聖化薰陶文教大闢以

鱗介而雜冠裳已非太平之體况以虎狼而盜名器尤爲  
赤子之殃一時恐釐葦章之晚今幸院司道府按姦剔蠹用  
夏崇文凡屬聽聞適符夙願伏乞剪除獨斷速賜題 請  
庶造福一方垂功萬世蚤見德化之成深慰來蘇之望等  
情又據水德司鄉官冉宗孔張守宗田時宜田于渭張治  
方田于耜羅萬象田助國羅萬鵬田報國等呈爲 南縣安  
民懇求穩便事竊惟政治在循良名器宜慎重茲者張治  
安土官張輅開造襲圖以來爭訟貳拾年今蒙鴻議式昭  
燕思改革土司開設縣治俾四圖之萌庶披霧觀青天一  
方之蒸蒸日上谷遷喬木非千古盛事哉第語云樹德莫如



滋去惡莫如盡今開縣樹德矣改司去惡矣而滋與盡猶所宜留心也蓋多一官增一害今謂治貴自願開縣憐而授之縣丞矣他日居丞之職行丞之事恃世襲以作威倚土官而播惡或下鄉巡捕或營管縣事牙爪復存噬吞仍肆求以安民民未之安也伊自謂百代故職不思今之士官非昔之頭目乎田宣慰之惡不減於楊應龍逆之誅順之用則此輩之祖安知非何漢良類乎故甲官乙承彼氏此居遷調靡常存亡互異故張楊貳氏皆別司土職而水德司則壽水冉希曾之祖也是者亡否者存延冒至今亦已足矣矧今改革而猶留此餘孽也且婺川以上知縣改

流甲江以正長官改流皆一知一典事辦民安未聞貳縣貳氏子孫復授土職水德圖籍不多於甲婺何賴此土縣丞佐理乎孰若槩而去之便各情由申呈到府據此該本府看得思南故宣慰田琛田茂安遺土也 明興貳宣慰就擒始建郡治比於內地其間多流寓之人其人多譎詐變幻之習附廓董董貳土司類皆瘠民肥己之輩安所資拊循也乃改縣一議所從來久矣屢請屢格議竟道傍雖云建制原非細故亦以作事貴於慎始要在因時而立政所以通變而宜民茲水德司正長官張輅以乏嗣之故而族人張治貴張治安爭襲不決旣蒙定畫改縣而以土縣



丞世其官以吏目爲典史誠經制大計無庸別議惟是副  
土官楊一龍亦無功 誥其爲僞襲均耳今一龍比照前  
例願襲土主簿情若可原事亦妥當但恩典出自上裁本  
府不敢輕議至於鄉官舉監諸生先後呈詞俱爲有見應  
否可行均乞蚤賜具 題庶經制定而體統不紊民心順  
而政務日臻下可以開一方千百年之業上可以昭 國  
家大一統之 等因各申詳在卷今又據該府申蒙本司  
紙牌奉巡撫郭都御史憲牌將水德司改土設流事情查  
議緣由該本府陰知府移會趙推官查議得該司在隋爲  
賓化縣唐因之五代歷宋并夔川縣至元時始改今司

國朝因之聞之故老云在昔印江改縣之時水德司父老  
曾有比例建縣之說第機無可乘之會耳今水德司正長  
官張輅故絕襲者百爭以致士民比照新貴銅仁之例爲  
請建縣此至公至當之論非一朝一夕之故儻不行之於  
今勢必行之於後與其行之於後而任斯民之魚肉孰若  
行之於今以慰斯民解懸之望爲快也不然改者何幸而  
登之春臺不改者何不幸而終處幽谷况有新貴銅仁貳  
縣故事在是宜及今毅然行之而不中格於聚訟斯民幸  
甚謹將建縣官吏俸薪柴馬門阜等項條款開列於後乞  
賜覆議施行等因奉批仰布按貳司會議通詳奉此又蒙



巡按金御史批據該府呈同前因蒙批布政司會同按察司再加詳議確報以便會題繳蒙此又經移會按察司詳議前來該本司左布政使趙健會同按察司按察使尤錫類分守安平道左叅政何偉分守思仁道右叅政洪澄源都司都指揮僉事陳所學操捕署都指揮僉事高垣屯田署都指揮僉事陳雲鶚議照改土設流誠爲安民至計用夏變夷實乃經治良謨水德司之人民久罹土官之剝削畏之不啻水火思沐王化之霑濡望之不啻雲霓卽今文風漸盛民物日繁一統之內莫非王民可使之久困於夷官而不見天日耶建縣之議誠有不容一日緩者且

縣建於附廓又無鑿築之煩費而官吏俸薪亦係額設之錢糧一勞永佚萬口樂從况正長官張輅因故絕而族衆賄爭副長官楊一龍肆貪饕餮而怨騰閭里貳姓俱無誥勅本該俱奪其襲貳官俱係有罪亦該俱革其官但念沿襲已久酌於情法以正長官爲土縣丞副長官爲土主簿隨縣掛銜不許管糧管捕此蓋法外之仁寓於改革之內伏乞俯順輿情亟爲題請救民水火之中措之生全之地地方幸甚等因呈詳到臣該臣會同巡按貴州監察御史金忠士看得貴州夷方風土本自與中原殊卽建制經理亦難以中國治國初殲滅田氏地方純是土夷以夷



官治夷民犬羊共牢而食其類自足相制比來文治翔洽思南爲黔首郡以夷官治華民薰猶同器而藏其勢必不相能故今土司士民十九欲改流者匪獨避夷以入華實欲去危而就安勢則然也然使土司無可改之隙則無罪而削其土必不聽矣又使削土無可援之例則無故而首難端亦不聽矣又使改流而有城池公署之費則所得不足償所費亦無益矣今查水德司土官相爭貳拾餘年張楊貳姓張氏長房已絕而治貴以呂爭贏此不得之家也貳房張翬之孫治安以賄奪襲此不得之法也楊一龍乘張氏鷓蚌之持欲收漁人之利護甲肆惡以讎其下此

不得之民也彼旣自干國典奈何猶事姑息任其爭官不一解焚聽其虐民不一引手耶昔行政而新貴治銅仁改而銅仁治龍泉改而龍泉治播州改而遵義治伍司改而平越治改流之利明白較著又不特婺川印江貳縣之例可循也已水德故在府城無築城鑿池之勞官吏衙署俸薪俱已處分無張官置吏之費所少者董貳百金而以小不備妨大不備耶據士民之呈請百口一詞道府之會議僉謀詢同臣等猶遲之貳年以觀物情駁行三司以觀輿論而今上下無異議矣故臣等亦曰改流便第士民曉曉猶謂張楊貳姓先世原無誥勅明係子孫冒襲今日



有罪當革不宜復令世爲丞簿其言似矣臣等又看得  
誥勅雖無可驗而歷代之承襲相沿子孫之不肖當改而  
祖父之故業可憫况新貴丞簿之新例可據龍泉伍司之  
丞簿已題恐難於水德而遂斬之第樹空銜於縣無令  
其管捕管糧彼卽欲肆毒無繇矣此亦皇上法外之仁  
非臣等所敢擅擬也旣經司道議確會詳前來相應具  
題伏乞 勅下吏兵貳部都察院再加查議如果臣等所  
言不謬將水德長官司改立壹縣恭請 欽定縣名鑄給  
印信特於楚滇近地調有才力知縣壹員銓選典史壹員  
前來任事將該司正長官參房張翎子孫改授土縣丞副  
土官楊一龍改授土主簿俱不許管捕管糧該司印信候  
縣印至日追繳俯將臣等一切建置條列事款覆議上  
請轉行遵照施行庶邊鄙之郡邑稍備而又困之士民獲  
甦矣爲此開坐會本謹題請 旨

計開

一議改設官吏

前件查得水德司改建縣治應設知縣壹員典史  
壹員將正長官參房張翎之孫擇壹人改爲  
土縣丞副土官楊一龍改爲土主簿職銜照  
銅仁縣例量給夫馬傘蓋銀兩俱不許管事



併照例設典吏陸名卽以本司見役參名改  
充并添設參名架閣庫壹名共柒名聽布政  
司臨期詳撥其該司吏目員缺應合裁革伏  
候

聖裁

一議官員俸給

前件查得知縣每月該俸糧本色貳石貳斗伍升  
每月折銀貳兩貳錢伍分每年該銀貳拾柒  
兩又折色伍石貳斗伍升每石折銀叁分每  
年該銀壹兩捌錢玖分本折色俸銀共貳拾

捌兩捌錢玖分今查該司正副土官每年共  
額有馬草銀貳拾肆兩門子各壹名弓兵各  
肆名每年每名各工食銀陸兩壹錢肆分每  
年圍傘銀叁兩玖錢以上通共銀捌拾玖兩  
叁錢合無於內動支貳拾捌兩捌錢玖分抵  
給知縣每年本折色俸糧尚剩銀陸拾兩肆  
錢壹分另作土縣丞土主簿馬夫圍傘等項  
支用其土縣丞土主簿各有祖傳田業并私  
置家產聽其照舊管業合無比照銅仁縣例  
每官每年各量給馬壹匹價銀捌兩馬夫貳



名銀陸兩圍傘銀貳兩共該銀叁拾貳兩卽於前原額門子弓兵圍傘抵給知縣俸糧外支剩銀陸拾兩肆錢壹分之內動支叁拾貳兩抵給土縣丞土主簿夫馬圍傘支用尚剩貳拾捌兩肆錢壹分另作知縣柴馬及門阜等役工食支用開數在後其典史每月該本折色俸米叁石卽以水德司裁革吏目俸給抵給無庸另議伏候

聖裁

一議官員柴馬併門阜各役工食

前件查得知縣柴薪合照該府印江婺川貳縣例肆名該銀肆拾捌兩馬夫貳名該銀貳拾兩門子貳名阜隸拾名庫子壹名禁子壹名斗級壹名共壹拾伍名每名該工食銀伍兩水夫壹名燈籠夫貳名每名工食銀叁兩轎夫肆名傘夫壹名每名工食銀伍兩肆錢以上共銀壹百柒拾玖兩卽以該司支剩原額門子弓兵等銀貳拾捌兩肆錢壹分改編其不足之數查得該府原編民兵壹百肆拾名每名工食銀柒兩貳錢近日地方無事合無比



照改編事例每名減銀壹兩貳錢共減出壹百陸拾捌兩連前支剩該司馬草門子弓兵等銀通共壹百玖拾陸兩肆錢壹分於內扣支壹百柒拾玖兩充作縣官柴馬及門阜等役支用尚剩銀壹拾柒兩肆錢壹分另作典史門阜及六房紙劄支用開數在後典史柴薪壹名該銀壹拾貳兩馬夫壹名該銀拾兩門子壹名卓隸貳名每名該工食銀伍兩水夫壹名工食銀叁兩共肆拾兩卽以該司裁革吏目原編柴薪門子弓兵等銀叁拾柒兩

貳錢抵給尚少貳兩捌錢卽於該府汰減民兵支剩銀壹拾柒兩肆錢壹分之內動支貳兩捌錢共足肆拾兩抵給典史柴薪馬夫及門阜工食支用尚剩壹拾肆兩陸錢壹分另作六房紙劄支用開數在後其該縣六房紙劄每月該銀貳兩共該銀貳拾肆兩除原額紙劄銀陸兩又支剩汰減民兵銀壹拾肆兩陸錢壹分尚少叁兩叁錢玖分不足貳拾肆兩之數卽於該縣開報紙贖銀內每年動支叁兩叁錢玖分支用伏候



聖裁

一議祭祀鄉飲公費

前件查得春秋貳季一祭鄉飲酒禮今水德司改縣附在府城不必另設學宮壇壝與夫 正旦 冬至 聖節俱止隨班行禮不必另議至於衙門公費過往官司下程酒席并各項必不可省者卽於水德司額編公費銀壹百兩內動支通前知縣典史俸薪人役公費等項共足肆百零叁兩捌錢玖分之數俱分毫 不加派於民仍刊榜懸示永爲遵守伏候

聖裁

一議脩建縣治

前件查得知縣公署大門壹座儀門壹座縣堂壹向衙舍貳向吏役書房公廨各叁間庫舍監倉等項典史公署樓門壹座廳房壹向書房貳間住宅壹向并左右耳房等項卽應以水德司治改縣但該司地形褊窄且房舍已損止存正廳叁間似難擴充合無將此司治與蠻夷司掉換蓋蠻夷司治規模宏敞尚有房料可以攬脩此一舉而兩得之道也其經費



合用工料亦照銅仁縣估計事例大約共該  
銀叁百陸拾兩今查府庫見有田良玉變產  
銀壹百叁拾兩併追楊一龍拆司治銀叁拾  
兩堪以動用尚少貳百兩另行區畫可以補  
充伏候

聖裁

題裁興黃參將疏

題為播地蕩平有年新增糧餉無措懇乞 聖明俯裁允  
員移駐守備以蘇窮邊以安地方事據貴州布政使司呈  
奉臣并巡按貴州監察金御史會牌照得貴州興黃地方

舊無參將近因討播始為

題設播平之後即當議裁彼

因經理方殷地方未定故為暫留今照經理又竣地方頗  
盜參將誠為冗員且本官廩糧與新兵月餉俱於新餉支  
給今餉銀已盡黔省無可繼支相應裁革以省浮費又查  
鎮遠清浪貳衛僅玖拾里清浪既有參將駐劄彈壓清鎮  
守備又駐鎮遠不無偏重似應移駐偏橋兼管興隆與都  
清守備兩相聯絡仰司移會按都二司新鎮都清守巡二  
道會議興隆新設參將應否裁革如果當裁新陞未任參  
將蕭孟京似當咨部別用清鎮守備應否移駐偏橋兼管  
興隆參將部下新兵應否汰撤逐一會議妥確具由通詳



以憑會題施行奉此又據經歷司呈抄蒙巡按金御史  
憲牌爲出巡事據都勻府推官羅德星議詳移都清守備  
駐鎮楊老旣可以控制麻哈又得以應援清平扼吭拊臂  
似爲得策前准撫院會稿議撤興黃新設參將改清鎮守  
備於偏橋二者關係地方應行併議仰司抄牌呈堂移會  
按都二司及新鎮都清二道僉謀集議改都清守備於楊  
老事體果否安便有無孤懸務須兩地不致偏廢緩急便  
於往來其官軍公署營房作何建立應用經費錢糧作何  
設處一併議確通詳等因抄呈到司蒙此該本司左布政  
使趙健會同按察司按察使尤錫類都司都指揮僉事陳

所學及新鎮都清守巡二道會議得貴州興黃舊無參將  
近於萬曆貳拾捌年播酋猖亂興黃正當賊衝故請添  
設參將練兵彈壓以副總兵陳寅領其事幸賴天威震  
疊播寇蕩平於時卽欲議撤又因皮林有剿苗之役暫留  
督戰近來地方盜戢副總兵陳寅已調任雲南新陞參將  
蕭孟京文未到任看得興黃參將原係一時添設之官貴  
州軍餉又當甚匱之際卽今銅仁總鎮兵糧尚有貳年未  
支貴州貳拾衛所軍糧尚有叁年未支安得餘糧以養添  
設兵將况自興隆而下有清浪參將以彈壓清鎮等衛又  
有清鎮守備可移偏橋衛兼制興隆相距不過陸拾里都



勻府又有都清守備地方偏僻可移駐平越府楊老站地方兼制清平相距亦不過參拾里麻哈州相去亦參拾里上下四衛聯絡統馭軍民均有所恃苗夷亦有所畏興黃參將似可裁革既不妨於地方之控馭亦可蘇貴州之貧困此實黔中長久之計新陞未到參將蕭孟京乞咨兵部另改地方至於參將部下新兵除陸續汰除及副總兵陳官帶往雲南共壹百捌拾名外今止存壹百參拾伍員名合無量留彈壓夷民請將清鎮守備移駐偏橋衛都清守備移駐楊老站其二守備各公署營房建置拜應用經費錢糧亦不甚多俟設法區處另詳等因會詳到臣該臣會

同巡按貴州監察御史金忠士議照時亂則地方之捍禦宜周故將領不得不備事平則庫藏之空虛宜慮故冗官不得不裁貴州興黃地方原無參將當播逆猖獗之時與師征剿需將為急乃題設參將以捍賊衝而以副總兵陳寅領其事有將則有兵有兵則有餉無非為征播設也蕩平之後即應議撤第皮林之役未了則折衝攸賴經理之役方興則攜貳可虞致留本官進討皮林彈壓黃平反參拾貳年拾月陳寅調任雲南彼時又當議裁第恐本官離任之後地方姦宄叵測徐觀變態以議進止今陳寅離任拾月矣新補參將蕭孟京即未到任地方亦頗寧矣則



參將果屬冗濫可裁也且黔中庫藏如洗軍兵枵腹荷戈  
應支俸糧仰給川湖二省多逋無從措給若留此冗官餉  
益匱乏則廩餉果難區處應裁也至於該參部下防禦新  
兵除已撤壹百捌拾名外其餘一時難以盡撤容臣等次  
第酌量汰革又查得興隆至偏橋陸拾里偏橋至鎮遠伍  
拾里鎮遠至清浪玖拾里清浪既有壹參將清鎮守備又  
駐鎮遠不無偏重應將清鎮守備移駐偏橋兼管興隆地  
方此清鎮守備之應移於偏橋也偏橋楚黔之交也都清  
守備向駐平越衛今查平越衛雖係要衝但離都勻麻哈  
衛州頗遠相應移駐楊老站楊老距平越叁拾里麻哈叁  
拾里清平叁拾里貳衛府州地方誠爲適中仍令該備不  
特往來巡邏道途此都清守備之應移於楊老也楊老平  
都之中也若貳備建置公署房舍等項爲費無多容臣等  
酌量措處相應具 題伏乞 勅下兵部再加查議將興  
黃參將裁革新陞未任參將蕭孟京另推別用行令清鎮  
都清貳守備官遵照分定地界管轄防守庶官無冗員糧  
免煩費其裨於地方非淺鮮矣爲此會本謹題請 旨

題催補道府缺官疏

題爲邊方道府缺官甚多懇乞 聖明亟賜推補嚴促赴  
任以安地方事據貴州布按二司會呈照得十三省布按



二司各有布政使按察使以掌司事而又設各道各府皆以地方遼闊人民衆庶非一耳目所能周故必賴多官分理之也况貴州四面皆夷無處非盜尤不可一處缺官者查得布政司原該分守道四員今止安平思仁二道在任而貴寧新鎮二道未補按察司該兵巡等道六員今止有畢節道參議兼僉事冉德升在任又以入賀行威清提學二道卽補官尚未到任思石都清驛傳三道未補各府知府共該十員今止有六府在任而貴陽思州銅仁都勻四府未補雖有署印之官終爲遙制不便或限於地所不及或迫於力所不暇未免顧此遺彼伏乞俯念邊方事變

不常各官拮据不前特賜題請速補各道府促其赴任

則免闕人廢事之愆而地方軍民有賴矣等因到臣該臣會同巡按貴州監察御史金忠士看得貴州乃三苗要荒道府爲一方保障使在在布列人人強幹猶患不足防禦而况五道四府無一料理者乎目今銅仁悍苗出沒叵測平清狡賊赤白交馳自興隆至普安上下三千里無一道臣彈壓臣等未嘗不委官兼攝而地方隔別遙長猝有急不過移文防守未能躬親管顧大則有鯨有鯢小則爲梟爲獍徼外意外之虞臣等所深懼也查布政司貴寧新鎮二道按察司思石都清驛傳三道貴陽思州銅仁都勻



四府久未推補威清提學二道雖補尚未到任見任畢節道叅議冉德升業已齎捧入 賀離任見任二司官止左布政使趙健按察使尤錫類叅政何偉洪澄源四員各府止六員以十道而缺其五以十府而缺其四襟提肘露毛疎皮單今據二司會呈前來相應具 題伏乞 勅下吏部再加查議未經推補者亟行銓補已經推補者乞 賜點用已補未任者嚴從赴任庶上下分理有人而封疆緩急攸賴矣爲此會本謹題請 旨

題洪叅政給由疏

題爲遵例考覈給由方面官員事據貴州布政使司呈奉

臣批據本司分守思仁撫夷道石叅政洪澄源呈稱見年四十五歲福建泉州府晉江縣人由進士萬曆十六年八月除授戶部湖廣司主事二十一年正月內陞本司員外郎本年十月陞本部廣西司郎中閏十一月陞廣西桂林府知府二十七年三月陞貴州按察司副使三十年二月陞授本職本年四月二十五日到任任內因平播經理敘功蒙巡撫貴州郭都御史疏開本職至誠堪以對天朗識明於略地攀轅畢節方誇滿路之榮蔭借著龍泉又綢一方之桑土薦舉一次又因擒斬播州通寇吳洪敘功蒙川湖貴總督王侍郎疏開本職經 全才鎖鑰重望平壁樹



西南之屏大造蜀黔英鋒消夷莫之氛名流江漢薦舉一  
次又蒙巡按貴州監察御史功疏開本職憂切震  
鄰誠能附衆運先人奪人之智庸在日中收以狄攻狄之  
勳兵從天上此一臣者望重金階謀恭玉帳輕裘緩帶所  
向成功相應優敘重賚者也薦舉一次又蒙巡按畢御史  
復命疏開本職明能馭虜誠可對天畢烏滿路棠蔭思  
銅一方霖雨薦舉一次扣至三十三年三月二十四日止  
連閏實歷俸三十六箇月三年考滿例應給由等因通詳  
奉批仰布政司查報奉此又蒙巡按貴州監察金御史批  
布政司查報蒙此該本司佐布政使趙健查結無礙議照

右叅政洪澄源溫恭玉潤廉潔冰清征叛除兇奇勳莫安  
黔蜀撫夷鎮俗弘猷鎖鑰西南稱職例應給由但本官職  
專分守思仁撫夷地方道務勢難離任且查雲貴考滿官  
員例免赴部又結查得本官父祖母妻竝無貪酷再醮例  
應請封呈乞考覈具奏等因呈詳到臣據此查先  
往都察院咨往吏部咨為酌議考課之法以肅吏治事內  
開三六年考滿在外方面官員給由免其赴京聽撫按  
從公考覈賢否具奏先令就彼復職管事牌冊差人齎  
繳等因嘉靖四十二年十二月初三日題奉世宗皇帝  
聖旨是欽此又往吏部咨為重責成以慎封典事內開



各省直撫按官以後各官給由於例應封者俱要本官查照發去格式明開父祖以何去官有無貪酷等項祖母母妻是否室女本職經何衙門保薦有無考語詳開一冊同司府覆查無異甘結赴部給由之日另報查考如有貪酷再醮及假覘薦次等弊本部查出或被入訐發參奏究處等因萬曆二十七年十月十四日題奉聖旨是欽此欽遵俱備咨前來通行欽遵去後今據前因該臣會同巡按貴州監察御史金忠士考覈得貴州布政使司分守思仁撫夷道右叅政洪澄源征蠻捷如破竹守官嚴於懷瑜西覩召棠蔽畢烏半壁東融趙日遍思銅二城稱職既

經該司覆查無礙又奉有聖旨考滿官員免其赴部之例除行令本官在任接俸管事文冊差人齎繳外相應題請伏乞勅下吏部再加考覈本官曾經總督川湖貴侍郎王象乾薦舉一次臣薦舉一次巡按御史畢三才薦舉二次父祖母妻查無貪酷再醮近例應得恩典併乞查酌施行爲此會本謹題請旨

題剿仲苗劫掠道路疏

題爲邊省苗仲蜂起劫掠道路地方危急懇乞聖明亟

賜剿除以解倒懸以安邊圉事據貴州布按都司會呈萬曆三十三年正月初九日據威清衛呈報正月初六



日雲南元謀縣典史趙陽行至本衛的澄河坡頭被賊百十餘人突出劫去行李財物并文憑一道殺傷子僕二人等因又據清平衛平蠻營把總王瑞呈報於本月初九日督兵護送行商至崆峒長坡被賊二百餘人出劫駝馬貨物殺死商人一名各兵奮勇斬獲賊級四顆等因又據都清守備李大諫呈報本年二月初七日強賊百餘在乾河打劫過客布馱補官齊治國督領楊老營兵并土巡捕姚應金等追至羊場河斬獲賊級三顆得獲布擔給還商人賊傷官兵阿頂等七名又據本官呈報二月十一日強賊百餘在於平越衛地名官田出劫過客該千總羅邦政督

兵追至獨木橋邊與賊對敵殺傷官兵李虎等五名復追至百里山隊兵王進等斬級一顆奪獲長槍長刀大弩各一件等因又據撫州客民黃岐五等告稱萬真生理充當金戶領銀五百餘兩并寄附五百餘兩於二月二十三日午時分路經頭橋被強賊數十餘人劫搶一空殺傷二命等情又據餘慶縣申報本年四月十六日強賊五十餘人擁進李倭家劫虜財物殺死軍丁李朝元鄉兵李朝剛等臨陣擊獲張啓徐周等因又據守備李大諫呈報五月初八日強賊百餘嘯聚平越衛東北城外殺死牧牛二人劫虜牛馬二十餘隻督率把總尚宗襲領兵追至地名毛口



堡奪回牛馬復追至地名馬駿嶺苗賊對敵殺死宗襲弟尚宗褒并土兵二名傷兵十名等因又據雲南鶴慶府順州吏目陳鶴呈稱赴滇上任五月二十日經過貴州衛龍洞鋪被賊百餘劫去行李財物一空等情又據守備李大諫呈報本年六月初三日強賊二百餘黨於高規打劫客布督兵臨陣斬級三顆奪獲長槍大弩各一件等因又據撫州客民全週九告稱販賣青布八批於六月十一日行至龍洞鋪界被賊百餘盡行劫去等情又據麻哈州并守備李大諫報稱麻哈州關外強賊數百坐草裝塘官兵追捕苗賊拒敵殺死官兵阿辰傷兵四名等因又據該備報

稱往麻哈州移報苗賊臨城欲劫州治催職策應六月初四日督兵於高規渾水塘遇賊突劫客貨追兵奮勇斬獲首級三顆初五日又據標兵走報本州關外有賊數百坐草裝塘該卑職卽督州捕吏日向士并三營官兵前往追捕被賊蜂擁齊起拒敵官兵陣前殺死土兵阿展殺傷飛兵阿念阿辛千總吳聯富士兵字羊字由并鄉兵阿成等四名該卑職主僕三人勒馬向前持弓齊射射中數賊方纔退散各賊仍將鄉官宋伯騾馬二匹劫虜去訖等因又據貴州前衛巡捕指揮徐用賓報稱初十日未時分被強賊百餘前來劫虜麥陽寨胡來現家殺傷三人劫去衣物



馬匹各項乞賜發兵殄除等因又據梅子哨兵阿升等稟稱六月十二日有工部譚郎中經過大凹強賊三百餘人突出劫搶時有防守界牌哨把總王曰賢率兵隨護追殺被賊將曰賢打傷剝去衣甲各賊入山漫散等情又據守備李大諫呈據清平衛報稱本年六月十二十五等日苗賊百餘臨城劫虜站民羅坎七陳付九等家殺死陳付九等八命十六日又劫落落登鋪十八日又劫不知名商人布擔二十餘挑十九日強賊百餘聚集孫家墳劫奪過客駝馬連日猖狂請乞加兵剿除等因又據該備呈據渾水營把總宋廷詔報強賊百餘在於地名落邦鋪大山出劫各

貨官兵拚命抵敵斬賊級四顆重傷兵阿奎等五名又據把總馬武卿呈報強賊百餘裝塘紗帽大山於本年六月十五日出劫谷子鋪過客駝馬二十餘馱各兵救護賊傷我兵四名拏獲賊犯阿五等因又據威清衛報稱雲南雲州知州劉秉鑰六月二十四日行至離城一里被強賊百十餘人劫去行李李文憑拜 誥命財物等因七月初三日又據原任涇潭縣知縣楊士彥呈稱卑職被論回籍雲南行至劄佐石板哨被強賊二三百餘將俸薪衣物行李扛擔盡劫一空等情又據原任廣西奉議衛經歷黃甲呈稱回籍貴州於七月初八日行至界牌哨被強賊百十餘人



劫去行李扛擔并文憑一道等情又據百戶陸萊臣報稱七月初九日巳時分有強賊數百各執槍刀榔頭蜂擁入歪脚堡抄虜軍舍平志高等七家劫去馬匹衣服財物一空殺傷彭世武等情又據守備李大諫呈報七月十一日夜強賊三百餘人各執兇器擁進新添站明火徑入生員顧軒家行劫原任雲南新化州知州張揆扛擔財物當有官兵截敵殺傷強賊數十彼賊勢大殺死軍餘後六兒又據把總王瑞呈報強賊百餘於本年七月十三日打劫清平王客并羅馬戶家官兵擒獲阿迫阿貴斬級二顆等因又據平越軍民府申報石阡府江知府家人江化龍回籍

雲南於七月十四日行至谷子鋪地名爛泥哨遭苗賊百餘將行李四扛盡行劫去又據新選雲南前衛知事程權呈稱卑職前去到任隨帶行李二扛內有盤纏銀三十兩并絹段衣物等項被賊盡劫一空等情又據雲南巡檢易好本家丁易真易昆狀稱帶銀六十兩回籍納糧被賊劫去等情又據谷子鋪軍何崇貴裴心德等告稱本月十五日遭賊數百蜂擁進鋪將各家豬牛器物盡抄一空等情同日又據前衛巡捕指揮徐用賓報稱省城東門外蓮花塘地方被賊明火執仗連劫軍人楊坤等一十三家等情同日又據把總周之德呈報卑職奉委巡邏拏獲細作楊



度五徐阿長并同夥軍人王文生梭出京青夾被青袴藍包袱各一件審據供稱曾往平越衛新化寨行劫又稱同夥苗賊百十餘人俱在班竹園劫搶往過官商乞賜剿處等因七月十六日又據貴州衛軍人張趙蕭等告稱陡遭夥賊數百鳴鑼進堡將合堡牛馬家財盡劫如洗登時殺死高良替等三命密查賊首係阿稍寨都保胡乃眉管下仲民阿讓阿者等做脚勾賊告乞擒剿等情又據都清守備李大諫呈稱本月十七日據谷子鋪土千總羅邦政稟稱邦政帶兵護送官杠行至黑泥哨忽遇強賊數百於未靖哨對門起塘砍劫官杠賊多兵寡難以敵殺乞賜大兵

剿洗等情同日又據得勝營千總劉興化稟稱同日率兵自阿丑哨起至清水哨一路梭山躡草探得大橋塘谷子鋪黑泥哨強賊三百餘人劫虜雲南官杠興化帶兵從西山奔進落邦會同大橋武勝等營官兵追進紗帽大山黑夜賊衆不能窮追等情本月二十七日又據貴州衛畢鋪鋪兵羅欽訴稱本年四月初十日以來賊上數百出劫本鋪十八日圍掩抄欽等耕牛八十四隻五月內又被浴門梭檢衣物一筋不留強拏妻女剝衣露體無片遮身子哭妻啼父號母怨七月初八日又劫黃經歷賊同轎馬至鋪先劫本官後虜衆戶各哨軍兵同鄉兵追至地名羅絲坡



賊多兵少不能對敵乞賜剿賊安民等情本月二十八日據安莊衛燕旗堡軍人陳文明告稱七月二十一日夜遭賊百餘圍堡殺死陳文曉等六命綁去軍妻吳氏男婦五口牛馬財物罄刼追至金筑司不行跟趕告乞剿除等情七月三十日又據原任按察司致仕經歷彭歷年告稱因足疾告休回籍二十八日自新添起行未幾一里輒被強賊三百餘人擁出將轎夫砍傷將年推倒傷足俸薪盤纏衣服鋪蓋箱籠盡刼一空等情又據貴州前衛巡捕指揮徐用賓報稱各賊藏在波羅阿保大王阿龍等山寨約有千餘人公然出入乞賜調兵剿洗等因又據定番州申稱

七月三十日強賊二百餘人白晝攻刼翁貴寨民秦志亨等家財物牛馬殺死危榮殺傷陳福各民奮勇對敵殺死強賊五人各賊仍於城外嘯聚不退去寫木刻先打關廂後打城池勢甚猖獗乞賜調發大兵剿處救民倒懸等因該布政司左布政使趙健會同按察司按察使尤錫類都司都指揮僉事陳所學操捕署都指揮僉事高垣看得貴州一省原是苗仲雜居國初雖設貴州新添平越威清等十四衛分布上下以通雲南之路而一線之外北通四川東接湖廣南通廣西皆苗仲也近自征播以來糧餉欠缺軍兵困苦兼以征播各兵不能歸籍者身無所依竄入



各寨潛爲打探消息與苗仲做脚串同勾引日益猖狂往歲劫盜間一出沒今則無日不出劫且一日而劫數起者矣往歲止數十成羣今則動輒數百爲夥且近千餘矣往歲昏夜潛出今則聚集山箐白晝公然肆出無忌矣往歲止劫客貨今則劫及官員盡其盤費衣服 誥命文引矣往歲尚竊發於山谷曠野今則窺伺府衛州城且逼近省會矣夥類日繁猖獗太甚殺虜商民燒燬房屋肆其慘毒不可勝計道路官商不敢往來屯堡軍民不敢出入貴州數百里之境將成盜藪雖哨守官兵屢有擒斬但賊衆兵寡止獲百之一二非大集漢土之兵不能盡撲滅而懲創

之此時若不蚤爲撲滅恐銅仁三省之苗聞風而起東西南北結連爲害勢益衆而難爲力矣伏乞挑選各衛精壯之軍及召募四方勇兵并調各土司夷兵選委將領相機剿殺或圍於山箐則圍而剿之或匿於庄寨則鷓而剿之務必空其巢穴絕其種類俾道路清寧軍民安堵地方幸甚等因到臣除批仲苗糾結犬羊騷擾道路官商竝苦神人共憤此 國法之所必誅者仰候會 題行繳外該臣會同巡按貴州監察御史金忠士看得盜多起於饑寒之迫切而黔中歲頗有年盜多困於官司之凌虐而苗民絕不見官然而今歲苗賊視往更甚臣等友復惟之往播賊



厚募惡苗爲羽翼播平散歸故寨不能盡殄四方募兵爲  
征播四至播平流落山箐便作勾引盜之繇也往滇黔俗  
樸陋近年以來俗尚奢靡富人衣彭段市民衣京青不惜  
厚值以市而商日湊滇出銅錫官滇者載而歸輜重蓋至  
苗民多以爲寶鏹而劫日熾盜之招也自平播後瘡痍未  
起庫藏益竭賊規知虛實以謂必不能復用兵又自興隆  
至普安上下二千餘里都清新鎮二道貴陽思州銅仁三  
府俱未銓補臣等才本庸下又鮮輔車盜之所以日恣無  
忌也盜初起時臣等謂偶一二起未敢以 聞微有斬獲  
亦未敢敘而今數月以來無論劫商卽官員被劫慘不忍

言無論夜劫卽白晝當路人不取問無論鄉村屯堡卽近  
城近省殺人無忌無論糾黨成羣且踰百近千嘯聚山箐  
甚至聲言欲劫雲南起解 御杠又丟木刻欲攻州衛等

處城郭衆集犬羊毒逾梟獍夫四郊多壘臣之辱也八番  
未靖臣之罪也臣等猶思其日長月增雄唱雌和小之如  
昔年韋同烈米魯之徒大之如古者黃巾青犢之流而臣  
之罪益無所逃矣今士民請剿之詞無日不訴府縣請兵  
之文無日不上又據三司會議賊惡已稔賊勢方張旣積  
鬼誅之罪正當 天討之辰臣查得原領 勅書開載如  
有盜賊相機剿捕臣謹遵 勅書調集漢土官兵宣慰使



安疆臣兵一萬分營於貴陽威清之間佐以指揮徐用賓  
祀總劉崙王安民魏國忠越其進李文學王嘉應鎮撫蕭  
如京而以都司高垣坐營馮邦濟督之以攻賊之西自龍  
里至平越以宣慰安疆臣萬兵爲主又以守備李大諫祀  
總馬武卿周之德劉崑土同知蒙詔土舍張鶴聽蕭芳羅  
國權分爲四營約近五千而以都司陳雲鶚遊擊劉岳督  
之以牽賊之東西賊之巢在老王山波羅清水箐阿倫哆  
囉阿郎洪麻王岡等寨八九十處不下數萬人而阿倫阿  
絨阿萬阿鴛王廷鳳等其賊首也東賊之巢在蝦麻塘紗  
帽山凱里大平伐小平伐的貢樂平等司寨六七十處亦

不下數萬人而阿皆阿戎阿浪阿晏阿落等其賊首也黨  
類甚衆聲勢甚強非大創之不可至於二路將兵監紀督  
餉等官總督將兵官左都督陳璘總督監軍官布政司左  
布政使趙健西營紀功按察司按察使尤錫類督餉威清  
兵巡道參政兼僉事王貽德分理糧餉貴陽府推官楊可  
成人營紀驗功級新貴縣知縣龔一慶東營紀功分守安  
平帶管新鎮道左參政何偉督餉分守思仁道右參政洪  
澄源分理糧餉平越府管府事運同楊可陶入營紀驗功  
級黃平州知州曹進可鎮寧州知州吳天祐近省地方與  
省會城池委掌印都司陳所學督同二衛印捕官防守臣



等猶慮諸賊奔竄湖廣檄清浪參將董獻策帶兵於偏鎮堵截又恐賊逸廣西委壩陽守備王應速帶兵於定番把遏各分理其事再照臣七年於黔矣討夜郎之後繼斬吳洪討皮林之後繼芟羅海臣非不知國小民罷財竭力殫顧事有亡可奈何勢有萬不獲已者不得不仰仗天威糾率義旅以拯此一方生靈况今年黔中頗秋田禾被野正因糧於敵之候而安疆臣地界已明母鳳氏恩賜卹典亦其努力報國之時臣與按臣謀議會同又與總兵官陳璘分布稍定乃敢馳疏以請伏乞勅下兵部行臣等欽遵施行爲此會本謹題請旨

再乞終養疏

奏爲老親病日尪危獨子例應歸侍再乞天恩俯容終養事臣章本以樗朽淪滯藩臬仰荷皇上校之塗泥授以節鉞八年於黔稍平叛亂皇上俯錄微勞驟增階秩上榮祖父下廕兒孫臣卽相糜無能報高厚惟是臣有八十之父七十之母雙雙倚門奄奄牀第望臣之歸以日爲年臣於三十一年疏告終養未蒙皇上俞允是時播水之地界未明道路之惡苗未殄臣未敢再請爲地方也今仰仗睿斷地界業已明矣恭行天討路苗亦稍靜矣臣萬不得已再申前請夫忠與孝非二物也事主與



事親無二道也地方多事而親病未危則國為重家為輕人臣當移孝以為忠地方稍寧而親病貼危則父母為急利祿為緩人子當後利而先義國家懸終養之令非獨以教人子孝求忠臣必於孝子之門實所以教人臣忠也臣父年八十有四一日老一日衰止生臣一人一日留一日病臣非生於空桑木不得不乞身於皇上國家終養有例獨子有例皇上三十年間許諸臣終養者俱有明詔似難獨靳於愚臣况臣在黔首尾八年瘡痍是殍罔兩與鄰兵戈未戢蘭綉為政質非金石能不銷鑠臣始入黔鬣未二毛今須髮為白頭顱已禿黔人見臣至有憐而泣下者臣年六十四耳而衰颯如此則臣父母七十八十歲老人其病苦哀颯不知當作何狀舉筆至此涕落橫頤伏乞皇上勅下吏部查臣父母是否真病臣是否獨子儻合明例放臣歸養別選賢能與臣速代俾臣蚤入玉關遙還子舍是皇上愛臣以德不以姑息臣感皇上以德不以利祿其於世教不無小補微獨臣一人一家銜恩已矣臣無任涕泣哀懇之至為此具本奏聞伏候勅旨

題征路苗恭報捷音疏

題為路苗山苗兩寇竝剿仰仗天威擒斬三千餘級恭



報捷音事萬曆三十四年正月二十六日據貴州西東二  
路監軍布政使司左布政使趙健西路紀功按察司按察  
使尤錫類東路督糧兼水砮山監軍紀功右叅政洪澄源  
東路紀功分守安平道左叅政何偉西路督糧威清兵巡  
道叅政兼僉事王貽德會呈奉臣憲牌照得貴州苗賊四  
出縱橫道路劫掠屯堡已該本院會同按院題請進剿  
時值田禾被野正當因糧於敵所據各路應用將兵與監  
軍紀功督糧等官合行分委舉事仰監軍布政司即將西  
路諸賊行令宣慰使安疆臣領兵一萬名佐以指揮徐用  
賓把總劉崙魏國忠越其進李文學王嘉言王安民劉岱

鎮撫蕭如京等以遊擊劉岳操捕都司高垣坐營中軍官  
馮邦濟督之東路諸賊行令都清守備李大諫把總馬武  
卿周之德劉崑獨山州土同知蒙詔并土舍張鶴猗金大  
璋羅國權楊國陞等率兵五千名以屯田都司陳雲鶚督  
之并令遊擊劉岳坐營官馮邦濟俟西路剿完仍移東路  
率兵進剿銅仁水砮山諸苗出劫行令叅將董獻策總鎮  
坐營官汪如淵署銅仁守備事指揮薛紹瑄把總戴宗茂  
熊宗棟陳欽陳諫沙應魁陳當用胡來賓等領兵攻擊三  
路將兵俱聽總兵官左都督陳璘統督節制但水砮山警  
報疊至必須總兵官親督兵進討俟剿完水砮即移師新



添進攻至於近省地方與省會城池委掌印都司陳所學  
督貴前二衛印捕指揮防守并造辦火器又定番州地方  
道通廣西行令壩陽守備王應速會同定番州知州萬曰  
軾率兵駐彼把遏西東二路監軍以布政司左布政使趙  
健西路紀功以按察司按察使允錫類督糧以威清兵巡  
道叅政兼僉事王貽德分理糧餉以貴陽府推官楊可成  
入營紀功以新貴縣知縣龔一慶東路紀功以分守安平  
道左叅政何偉督糧以分守思仁道右叅政洪澄源平越  
分理糧餉以平越府管府事運同楊可陶入營紀功以黃  
平州知州曹進可新添紀功理餉以貴陽府通判徐淳友

水硤山監軍紀功兼督糧以分守思仁道右叅政洪澄源  
入營紀功以鎮遠府推官鄧希稷理餉以銅仁府推官譚  
完應用糧米除西路宣慰安疆臣兵糧自裹不運外東路  
省城委按察司知事唐時雍貴前二衛指揮楊師震爲守  
仁新貴縣典史申萬鏗分運上衛運米委安順府知府喬  
惟槐指揮黃運清鎮撫張鶴翀總催普定衛委指揮黃崇  
正李光春蔣國勳平壩衛委指揮金鳳鳴黃映裳千戶李  
以謙楊東明威清衛委指揮張九德涂顯祖東路龍里衛  
委思南府推官張文英指揮蘇民悅分運水硤山糧米委  
思南府知府陰鎔石阡府知府江大鯤思州府署印平越



府同知李在公思南府經歷陶成禮銅仁府省溪司吏目莊一貫銅仁縣典史黃一揀率夫分運應用百子銃鳥銃刀斧鋤鋸委指揮張世卿雜獻圖千戶劉世臣打造魚鹽委指揮楊祖禹千戶傅良臣吏目王惟善李樹華文解前往楚蜀買辦該司備行各委官務要輸心殫力爲國除兇敢有玩忽違令者以軍法從事奉此就經備行各官遵照去後又奉軍門憲令擇於三十三年八月初六日誓師本月初八日入箐開刀奉此又經嚴行申飭當該監軍左布政使趙健遵依親督漢土官兵臨巢監剿隨准總兵官左都督陳璘手本移報據西路領兵宣慰安疆臣呈報同

坐營官馮邦濟鎮撫蕭如京督率漢把王嘉猷周維成吳從衆袁顯自頭目化跨阿縱喇罵色白卒魁亞祭縱白弟普豆麻容遮白的阿四阿列等督領部兵一萬名攻打老玉山波羅清水阿倫哆囉可龍平茶木角阿郎洪麻王岡鷄冠羊梅琴堡巴香會築馬場磨盤鍋底等營諸賊俱先聞風預脩柵壕設伏以待我兵一至諸賊披堅執銳齊擁拒敵我兵奮勇戮力設奇血戰自八月初八日起至十月十四日止生擒原題疏內有名大賊首阿倫阿絨阿鷺三名并黨賊五十一名斬獲賊級三百四十九顆墜崖跌死者不計其數俘獲賊屬五十五名口奪獲牛馬三十三



黑牛 卷之八 五十六  
隻賊仗七十六件諸葛銅鼓二面陣亡頭目裸驢阿農二  
名招撫過苗仲男婦阿成等二千三百一十五名口本司  
宣慰宋承恩同知安大貴率兵生擒強賊七名斬獲賊級  
五十顆俘獲賊屬二十七名口奪獲牛馬八隻諸葛銅鼓  
二面陣亡罵色阿翁臥卒二名又淮西營領兵遊擊劉岳  
坐營官馮邦濟都司高坦移報督領指揮李棟材徐用賓  
鎮撫蕭如京千戶李春元把總劉崙劉范和王詔劉岱劉  
廷王吳秉鉞鄭國禎沈輔明馮承烈王嘉言越其進魏國  
忠徐鈺徐用輔宋真相呂聯芳林懷遠王必進蕭雲李朝  
國越崇功庾仕爵謝三德黃道吉旗牌官王安民李文學

百戶張東升哨官高其位何尚卿劉念祖楊祖夔葛師儀  
王宣劉春和俞汝忠武舉劉宗良土官舍楊光世楊光先  
舍人王光祖宋文焯旗甲頭人余元來鄧隆沈受二葉二  
倪文炳等率兵攻打老蓬改牛洪麻鷄冠山王岡鷓鴣波  
羅羊梅清水毛口康寨蓋穴白羊鍋底五馬歸巢董紀谷  
冲可龍等箐自八月初九日起至十一月初八日止生擒  
原 題疏內有名大賊首阿萬并黨賊七十一名斬獲賊  
級三百二十九顆俘獲賊屬六十五名口奪獲牛馬四十  
五隻賊仗一百二十八件諸葛銅鼓二面招降過苗仲男  
婦阿歪等一千八百三十一名口又 掌印都司東所學



移報奉委防守城池并把截近城賊隘督率中備王應速  
指揮葛守仁馮國恩張承爵劉世爵鎮撫張鶴翀百戶蔣  
宗周沈雲鵬于世科把總葉天植王見龍梁之賓孫希臯  
陸應春陳紀新貴縣署典史事巡檢匡轍土官程弘道龍  
啓元石國正降夷老段龍鋪兵王選等率兵生擒強賊二  
十三名斬獲賊級五十三顆俘獲賊屬二十六名口奪獲  
牛馬一十三隻賊仗一十六件等因除移紀功按察司行  
委知縣龔一磨紀驗功級外本年十一月十九日又准水  
碛山監軍分守思仁道右叅政洪澄源移報准總兵官左  
都督陳璘手本移稱水碛山十三寨惡苗流毒銅仁思石

四府居民在在受害赴告被劫殆無虛日且屢撫屢叛罪  
惡貫盈而大苗頭吳老喬僭頂將中身服紅袍張蓋擡轎  
鳴金吹打糾衆出劫而各寨苗首侯興吳老成石老四等  
悉稱首惡虎肆鴟張本年八月內按院巡歷石阡吳老喬  
輒敢聚黨遠出公然於城外一舍之地打劫居民財畜搶  
奪驛馬本鎮切齒腐心移請兩院俯從征剿調募精兵一  
萬二千員名分爲四路竝進以叅將董獻策坐營官汪如  
淵署銅仁守備事指揮薛紹瑄各領一路本鎮督標營慣  
戰旗鼓官指揮洪應選把總戴宗茂熊宗棟陳敘陳諫沙  
應魁陳富用胡來賓金國禎程式蕭美中唐秀茂張萬英



宋廷祿陳大縉吳嘉隆劉鳳吳永貴鄭崇憲柴可成梁應科楊子直蕭倅通蔣廷通蔣奇策張德龔頂譚裕鄒龍張汀張應朝穆國讓楊政萬戴罪指揮陶應龍劉之屏等率兵爲中軍於九月十三日入山開刀起至十一月初九日止計擒獲大賊首吳老喬侯興吳老成石老四等六十六名并斬獲賊級一百九十五顆擒斬通共二百六十一名顆顛仆崖壑者不知其幾俘獲賊屬四十六名口牛馬二百零一隻奪回被虜生靈老金張妹老何等五名口賊仗七十四件等因除行推官鄧希稷紀驗功級外又奉兩院憲令於九月內移師剿洗東路諸賊續往東路領兵

劉岳都司高垣陳雲鶚坐營官馮邦濟移報督率守備李大諫指揮李棟材吳國柱郭維藩把總魏國忠葛宗儀王嘉言馬武卿周之德葉天植劉崑劉崙劉范和王詔劉岱劉廷玉華統鄭國明鍾一麟華尚文尚宗龔詹元富徐用輔楊有功陳起龍戴起臣羅貴鄔正志董仁朱楫林葵羅允文毛宗益趙友仁唐朝勝土同知蒙詔土舍金大璋羅國權張鶴翥甯國梁宋拱乾宋維垣蕭國讓庭拱辰宋廷環宋國臣宋國甲甯之翰金全武會舉王有道孫耀祖柳國柱武生陳人龍陳檜哨官陳守貴社金貴降民王文王富奔倫劉世高頭自莫永祥等率兵攻打規槽菁果兒山



白崖蝦蟆塘水洞東苗黃苗前王傅家庄百里平多各柴  
崖下凱里鐵榜書眉栗木守墳烏乍茶山等箐自八月二  
十三日起至十一月二十二日止生擒原 題疏內有名  
大賊首一名阿浪并擒黨賊二十二名斬獲賊級二百八  
十顆俘獲賊屬一百四十一名口奪獲牛馬五十一隻賊  
仗一百三十六件諸葛銅鼓四面招降男婦阿斜等二千  
二百一十九名口宣慰安疆臣呈報同督陣鎮撫蕭如京  
率兵攻打乾溪水洞黃苗瀨子鐵廠山等箐自十月二十  
五日起至十一月十五日止生擒強賊四名斬獲賊級六  
十三顆內一顆係原 題疏內有名大賊首阿晏俘獲賊

屬十一名奪獲賊仗二十五件招降過男婦阿樹等五百  
八十六名口陣亡罵色阿四又據平越府申報本府管府  
事運同湯可陶督黃平州知州曹進可率府州土兵攻打  
高坪牌龍坑蝦蟆塘水洞山賊箐生擒強賊六名斬獲賊  
級一十六顆俘獲賊屬七名奪獲牛馬八隻賊仗二十四  
件一時漢土官兵分投攀援冒險直抵水洞大山西至白  
崖復由水洞山後茶山又至水頭中寨後山直搗蝦蟆塘  
賊皆潰散棄營而走所遺九大營盡數燒燬復用大斧砍  
開山木闢成大道沿途標寫兵到月日又據宣慰安疆臣  
漢把李輔等呈報領兵直搗水洞黃苗山將賊營房盡數



燒燬遺下草米八十餘捆已盡給各兵等因各報到司查  
得西路功級生擒一百五十六名斬獲七百八十一顆擒  
斬共九百三十七名顆水碾山生擒六十六名斬獲一百  
九十五顆擒斬共二百六十一名顆東路生擒三十三名  
斬獲三百五十九顆擒斬共三百九十二名顆三路通共  
擒斬一千五百九十名顆已經呈報軍門業蒙塘報訖自  
塘報之後今該本司躬入東路監督攻剿於三十三年十  
二月二十八日據宣慰安疆臣呈報督漢把周愷李輔等  
領部兵攻打狗耳夏家蛇場的落等箐自十一月二十八  
日起至十二月二十六日止生擒強賊一十二名斬獲賊

級三十八顆燒燬營房四十餘間陣亡頭目龔洋史敬者  
白袁蒼四名招降過舅婦阿生等三百八十七名口宋承  
恩部兵生擒強賊二名又准遊擊劉岳移報并據坐營官  
馮邦濟守備李大諫王應速報督指揮李棟材把總劉范  
和王詔劉崙李良材華統鄭國禎旗牌官甲鎮國把總陳  
紀鄭國明鄭國英劉富王朝選王瑞宋廷詔王宗舜吳來  
聘土官舍楊國陞盧世臣金大璋羅國權庭拱極何大與  
千戶高萬里黃勝元吏陳宗慶鄉導鄒世臣頭目王國清  
降夷老段龍等率兵攻打斗蓬谷冲谷攘瓜蠟甲穴擺羅  
程番關擺龍門樓小江賊箐自十一月二十八日起至十



二月二十六日止生擒原題疏內有名大賊首一名阿落并黨賊二十三名斬獲賊級七十二顆俘獲賊屬三口陣亡把總鄭國英趙友仁二名又淮紀功分守安平帶管分守新鎮道叅政何偉咨據平越府管府事運同楊可陶申據黃平州知州曹進可申報同守備李大諫督土同知蒙詔平越衛指揮奚國柱林起鳳千戶李朝陽經歷陳江定知事劉本典史劉起江百戶范體元劉再邦薛應時韓紹縉土官羅袍楊位楊開運宋世孝猶國柱楊鯨毛守爵把總安世禎宋世臣羅國棟等率漢土官兵攻打錢科坪大箐自十二月初三日起至初七日止斬獲賊級一百四

十一顆生擒強賊一名奪獲賊仗四十八件馬七匹牛七隻賊屬一十九名口燒燬賊巢九處陣亡兵八名招降過男婦阿新等一千八百九十六名口等因又淮總兵官左都督陳璘揭報相同三十四年正月二十六日又淮總兵官陳璘移報奉軍門憲令照得水碾山業已蕩平而東路諸賊尚未盡掃備行本鎮移駐新添統領將兵檇巢攻擊該本鎮遵依自銅仁移師新添於三十三年十二月初十日到彼連日偵探諸賊嘯聚巢穴親督清浪叅將董獻策聽用叅將劉效節都司陳雲鶚率把總戴宗茂洪信吳嘉隆張汀劉鳳吳光宗胡來賓尚宗襲張萬英雷正春趙一



鳴周朝佐王汝賢張世臣熊宗棟將其策譚裕楊惟中指  
揮楊芬土官舍蒙詔楊國陞宋國印金大璋羅國權等統  
領漢土官兵五千員名自三十四年正月初一日起至本  
月二十五日止攻打崖頭獨木橋阿邦國龍井巴香都爐  
等箐諸賊官兵奮勇斬獲賊級一千一百二十一顆生擒  
原題疏內有名大賊首一名阿皆并擒黨賊七名餘賊  
大敗奔墜崖谷死者與餓死屍橫遍野者無筭奪獲諸葛  
銅鼓二面牛一百零五隻馬五十六匹俘獲賊屬二百八  
十名口招降過男婦阿羊等三千一百零七名口等因各  
報到司除移紀功新鎮道行委通判徐淳友紀驗功級外

該監軍左布政使趙健查得東路功級除前次塘報三百  
九十二名顆外今又自三十三年十一月二十八日起至  
三十四年正月二十五日止生擒四十七名斬獲賊級一  
千三百七十二顆擒斬共一千四百一十九名顆總計西  
路東路二起生擒原題疏內有名大賊首阿倫阿絨阿  
萬阿鷺阿皆阿浪阿落七名斬獲阿晏首級一顆水碾山  
生擒賊首吳老喬侯興吳老成石老四四名三路共擒黨  
賊二百九十一名斬級二千七百零六顆擒斬通共三千  
零九名顆招降過男婦一萬二千三百四十一名口是役  
也自西苗以至水碾山苗其地千有餘里大山深箐堪以



藏聚各賊者百有餘處兵西擊則東遯南按則北走非深入窮追必不能殄其穴而馘其人故自八月誓師迄今正月二十五日合漢土官兵數萬將領把守自負自西及東漸次竭力攻剿方得誅其首惡殄其羣醜卽未能噍類無遺亦已喙息鼠竄自今畏威來降者猶不啻數千俱給之免死以示不殺之恩老弱扶挈出見者不啻數萬盡招之使還故土以廣竝生之惠由是分兵選將設哨守要以爲善後之計以圖萬全之策庶乎道路可清商旅可通而黔民劫掠之患少蘇矣其間一二漏刃竄藏崖穴者各職切責將士盡力梭山騷除外合行捷報等因到臣據此案查

萬曆三十三年十一月二十三日准兵部咨爲邊省苗仲蜂起劫掠道路地方危急懇乞 聖明亟 賜剿除以解倒懸以安邊圉事奉 聖旨這苗惡旣稔天討宜加一切征剿事宜俱依擬許便宜從事務保萬全以安遠人欽此移咨前來就經備行各將領及監軍紀功督糧等官遵照去後今據前因除行監軍紀功司道將生擒賊首阿倫吳老喬等牢固監候斬獲功級查驗掩收標記候按臣覆覈外該臣看得貴州之苗在東西二路名曰仲家蟠据於貴龍平新之間實諸苗之頭目在水碾山名曰山苗跳梁於銅仁思石之竟又紅苗之羽翼一則恃千里種類之繁怒



饑甯輒敢懷拒轍之心一則傾黔中平播之後帑竭力殫無能爲再舉之役以故三十三年內無一月不出劫無十日不報警掠商人而禦其貨遂不保其首領劫官士而奪其貲且辱及其妻孥又之嘯聚林菁聲言欲窺城池犬羊之惡滔天神人之憤切齒臣萬不得已會按臣請命於朝仰荷 皇上嚴旨令臣必剿許臣便宜從事又責臣務保萬全 皇上秋殺與春生竝行破竹同繫桑兼命臣用是益加兢惕與按臣金忠士晝夜協謀以水碾山先責之總兵官陳璘參政洪澐源用本營漢兵爲主而益以土兵以西路專責之監軍參政趙健用安疆臣夷兵爲主而督

以漢官二寇旣蕩而後專責總兵官陳璘親入東路雷擊慧掃以收全局雖其千巖萬谷不敢謂盡殄其種而草薶獸獮亦庶幾深入其阻西路苗頭阿倫阿絨阿萬阿鴛東路苗頭阿皆阿浪阿晏阿落水碾山苗頭吳老喬侯興吳老成石老四等或生而擒之行間或斬而築之京觀是皆仰仗 皇上天威震疊 明旨森嚴執政據忠謨於 廟堂樞筦授方略於邊圉省垣讜議職方區畫咸劉厥敵惟斷乃成故臣卽愚猶得協同總兵鼓舞將士借三冬農隙之時獲三千斬馘之功道路如故官商無驚豈獨殊方奉揚 王休共老於覆露亦使愚臣恭行 天罰得免於罪



堡督 皇上恩威所暨也除已敗殘苗行各將官盡按陸  
續再報斬獲功級行司道紀實候按臣覆覈見獲銅鼓另  
差官解 進大小將官功次容臣再覈另行 題敘外伏  
乞 勅下兵部再加查覈候臣造報功冊至日行巡按御  
史覆覈施行爲此具本謹題請 旨

再奏討苗捷音疏

題爲官兵奮勇按剿路苗仰仗 天威續獲千級再報捷  
音事據貴州東西二路監軍布政使司左布政使趙健西  
路紀功右布政使管按察司事尤錫類思銅督糧按察使  
管分守思仁道事洪澄源東路紀功分守安平道參政何

偉東路督糧威清兵巡道參政兼僉事王貽德帶管西路  
督糧提學道僉事甘雨會呈奉臣憲牌照得東路諸賊雖  
已次第就戮而山箐聯絡林木叢叢其中漏刃者不少若  
非掃蕩掃除未免仍貽後患仰監軍布政司嚴督將士四  
面齊撲併力夾剿以清道路奉此就經嚴行各將領遵令  
統兵四圍按剿去後隨往總兵官左都督陳璘移報本鎮  
親統清浪參將董獻策聽用原任參將劉效節遊擊劉岳  
都司陳雲鶚守備李大諫王應速會領把總戴宗茂洪信  
吳嘉隆張汀劉鳳吳光宗胡來眉尚宗襄張萬英雷正春  
趙一鳴周朝佐王文賢張世臣熊宗棟將其策諱裕越其



進馮承烈魏國忠葛宗儀印鎮國將宗周楊惟中指揮楊  
芬土官舍蒙詔金大璋羅國權張鶴翥經歷陳江定知事  
劉本等率兵攻剿平伐雨把龍山甕水賈戎大廣擺什董  
榜擺地長擺大谷桃花庄苦竹洞口等等諸賊自二十四  
年正月二十九日起至二月二十六日班師止斬獲賊級  
一千零三十九顆生擒強賊三名俘獲賊屬二百六十二  
名口奪獲牛三十三隻馬五十三匹賊仗五百三十五件  
餘賊饑餓死者難以數計招降男婦阿拱等一千三百五  
十四名口又監軍左布政使趙健親督宣慰安疆臣坐營  
官馮邦濟鎮撫蕭如京旗牌官李文學把總劉范和王詔

率土兵攻打工固龍山白崖等斬獲賊級一百零四顆生  
擒強賊二名俘獲賊屬一百零一名口奪獲賊仗九十五  
件燒燬營房四十九間陣亡兵三名其等嶺巖穴諸賊本  
鎮業經竭力騷除等因移報到司除行委紀功通判徐淳  
友知縣龔一慶查驗功級外該監軍左布政使趙健查得  
東西二路及水碾山功級除先已奏報三千零九名顆  
外今又自三十四年正月二十九日起至二月二十六日  
奉軍門憲牌班師止斬獲賊級一千一百四十三顆生擒  
伍名擒斬共一千一百四十八名顆總計前後二起通共  
擒斬四千一百五十七名顆招降男婦一萬三千六百九



十五名口諸等巖谷皆已盡力搜剿一帶道路通達如故  
合行再報等因到臣案照萬曆三十三年十一月二十三  
日准兵部咨爲邊省苗仲蜂起劫掠道路地方危急懇乞  
聖明亟賜剿除以解倒懸以安邊圉事奉 聖旨這

苗惡旣稔天討宜加一切征剿事宜俱依擬許便宜從事  
務保萬全以安遠人欽此欽遵移咨前來就經備行各將  
領及監軍紀功督糧等官遵照去後今據前因該臣看得  
道路諸苗賊惟巖谷是憑而巖谷四通故撲滅未易前次  
捷之後臣思漏孽不除終貽後患欲除後患惟在窮搜該  
臣嚴責漢土將領四面併攻乃總兵官陳璘奮貔虎之威

殲鬼蜮之寇口授臂指虹銷霧豁自先次 奏報外續又  
斬馘一千零四十二名顆宣慰安疆臣除先次 奏報外  
續又擣獲近省工固龍山劇賊一百零六名顆連前報三  
千零九名顆通共四千一百五十七名顆雖未敢謂隻輪  
不返亦庶幾於再鼓而衰目前商旅接踵而來軍民出疆  
無虞此皆各將官奮勇漢夷軍士用命之所致也除將斬  
馘功級行紀功司道紀實候按臣覆覈大小文武將吏功  
次容臣再覈另行 題敘外伏乞 勅下兵部再加查覈  
俟臣造報功冊至日行巡按御史覆覈施行爲此具本謹  
題請 旨



恭進銅鼓疏

題為恭進銅鼓事據貴州總兵官左都督陳璘呈報征剿東路苗賊統督將兵攻擊獨木橋阿邦因搜獲諸葛銅鼓二面驗係古器呈解轉進等因又據監軍布政使司左布政使趙健呈報監督大兵剿洗東路諸賊據游擊劉岳中軍官馮邦濟把總越其進呈解於鐵榜山搜獲銅鼓二面又據西路紀功右布政使管按察司事尤錫類呈報據指揮徐用賓把總劉崑呈解攻打波羅可能箐搜獲銅鼓二面又據東路紀功分守安平道參政何偉呈報運同楊可陶知州曹進可守備李大諫呈解攻剿前科坪蝦蟆

塘搜獲銅鼓二面又據宣慰安疆臣申報率兵攻打西路鍋底箐搜獲銅鼓二面宣慰宋承恩把總宋真相呈報率兵攻剿西路羊場箐搜獲銅鼓二面共一十二面各呈解到臣據此案照萬曆三十三年十一月二十三日准兵部咨為邊省苗仲蜂起劫掠道路地方危急懇乞聖明亟賜剿除以解倒懸以安邊圉事該臣會同巡按貴州監察御史金忠士具題前事本部覆奉聖旨這苗惡既稔天討宜加一切征剿事宜俱依擬許便宜從事務保萬全以安遠人欽此欽遵備咨前來就經行令各將領并監軍紀功督糧等官遵照去後隨據監軍布政使司左布政



使趙健呈報三路擒斬功級共三千零九名顆該臣於萬曆三十四年正月二十八日 奏捷訖近據監軍左布政使趙健呈報東路續獲功級一千一百四十八名顆連前通共四千一百五十七名顆又於本年三月初八日再報外今據總兵官陳璘等呈解銅鼓一十二面前來該臣問之土人僉曰諸葛鼓謂孔明南征時造也然考之故漫無所證第其款製不似今式意必百千年物矣臣復考後漢書馬援傳載援征交阯得駱越銅鼓乃鑄為馬式還上之注引廣州記狸獠鑄銅為鼓懸於庭置酒招致同類來者以金銀為大釵執以扣鼓扣竟留遺主人則在後漢狸獠

已有銅鼓非起自諸葛也臣昔為潮州知府過南海神廟廟懸二銅鼓與今黔苗銅鼓相似又黎平府志稱郡銅鼓衛銅鼓守禦所皆以馬伏波銅鼓故名則此器之名其來久矣臣又查得萬曆五年四川征九絲蠻得銅鼓若干撫臣以進又查萬曆二十八年征播得銅鼓十二面督臣李化龍會同臣以進今總兵官陳璘等陸續解到共一十二面臣謹援例進 上雖蠢爾鬼方豈敢望胤侯之鼗鼓而陳之王會亦庶幾魚復之鼓鐘伏乞 皇上勅下兵部再加查驗藏之武庫上以昭 陛下不遐遺之仁下以示遠人無忘服之義此則臣一念區區之愚忠非徒以其物已







